

Guijtz Ni Bacuaa Mateo

Retoxpen_goldoo Jesucrist (Lc. 3:23-38)

¹ Guijtz ni rusule' laj retoxpen_goldoo xten Jesucrist xi'n toDavid, xi'n toAbraham.

² Abraham gujc xtad Isaac, Isaac gujc xtad Jacob, Jacob gujc xtad Judá con rebejtzni.

³ Judá con Tamar gujc xcuzajn Fares con Zara. Fares gujc xtad Esrom, Esrom gujc xtad Aram.

⁴ Aram gujc xtad Aminadab. Aminadab gujc xtad Naasón. Naasón gujc xtad Salmón.

⁵ Salmón con Rahab gujc xcuzajn Booz. Booz con Rut gujc xcuzajn Obed. Obed gujc xtad Isaí.

⁶ Isaí gujc xtad reii David. David con nani gujc cháäl Urías gujc xcuzajn Salomón.

⁷ Salomón gujc xtad Roboam. Roboam gujc xtad Abías. Abías gujc xtad Asa.

⁸ Asa gujc xtad Josafat. Josafat gujc xtad Joram. Joram gujc xtad Uzías.

⁹ Uzías gujc xtad Jotam. Jotam gujc xtad Acaz. Acaz gujc xtad Ezequías.

¹⁰ Ezequías gujc xtad Manasés. Manasés gujc xtad Amón. Amón gujc xtad Josías.

¹¹ Josías gujc xtad Jeconías con rebetzni cheni huij reben Israel pres lo guedx Babilonia.

¹² Che gudejd huij rebejn_ga pres Babilonia, dxejc guyu' xi'n Jeconías, Salatiel. Salatiel gujc xtad Zorobabel.

13 Zorobabel gujc xtad Abiud. Abiud gujc xtad Eliaquim. Eliaquim gujc xtad Azor.

14 Azor gujc xtad Sadoc. Sadoc gujc xtad Aquim. Aquim gujc xtad Eliud.

15 Eliud gujc xtad Eleazar. Eleazar gujc xtad Matán. Matán gujc xtad Jacob.

16 Jacob gujc xtad José cháäl Marii nani gujc xnan Jesús ni birilaj Crist.

17 Ni'cni gujc tzudaj xfamil reni agudejd gubi'reni lo guedxliujre che gubajñli toAbram cheni gubajñliza torei David. Tzudajza rexagdoonajc reni gudejd cheni gubajñli toDavid cheni huijli reben Israel pres Babilonia. Stzudaj rexagdoonajc reni gudejd cheni biriilireni pres Babilonia che gojlli Crist.

Cheni gojl Jesucrist

(Lc. 2:1-7)

18 Scree gujc cheni gojl Jesucrist. Abia'n xnanni, Marii, diidx guchñaani José ni gac cháälñi. Per ansde xca' sa'reni, Marii agac nuxi'nni sa'csi biääd Sprit Dxan xten Dios lojni.

19 José com najcni te beñsa'c, di rlajzni nuro'nni Marii nez loj rebejn te niacheereni, ni'c bejnñi xhigab Guřonxhiga'tzni Marii.

20 Xhigabga cayujñni cheni baluiloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni cháällu sa'csi xi'nni nani chu najc xten Sprit Dxan xten Dios.

21 Che gaal xi'nni cuälajluni Jesús sa'csi laani guslaani rexpejñni lo rextojñreni.

²² Guiraa redee gujc si'c te guzojb diidx ni gunii tej ni bacuaa xtidx Dios. Räjpn:

²³ Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajn con nuure).

²⁴ Che gubajn José lo bacal, bejn ni si'cni räjp xangl Dad lojni. Cua'ni Marii gujc chääl ni.

²⁵ Luxh dini niembeeni si'c chääl ni dxejli cheni gudejd gojl xingangalojni ni gulälajni Jesús.

2

Che biädhuu reben nanduxh ni laa remagos lojni

¹ Cheni gojl Jesús neñ guedx Belén xten guedx Judea, najc Herodes rei xten guedx Judea. Dxejc bidzujñ reben najñ ni najc remagos, siädreni neñz cadro rliejn gubijdx, bidzujñreni guedx Jerusalén.

² Rniabdiidxreni:

—¿Con rei xten reben Israel nani golgaj, ä? Nurnu abihuiinu xpajñni laadxlínu, ni'cni siopdonni.

³ Che biejn diajg rei Herodes diidxga, guyuduxhni yärsia' nájza guiraa reben Jerusalén.

⁴ Dxejcti batie'ni guiraa rebixhojzro ni rnibee loj rebixhojz, nájza guiraa renani rulúi xleii Moisés lo rebejn te gunabdiidxni lojreni:

—¿Caro gaal Crist?

⁵ Laareni räjpreni:

—Neñ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

⁶ Luj guedx Belén xten guedx Judea, dilu gajc maazru huin loj reguedxro xten guedx Judea sa'csi neñ guejdxre guirii tej nani guinibee, te ni ga'p rexpenä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni.

⁸ Dxejcti baxhalnireni guedx Belén, räjpni lojreni:
—Colchäj ro'c, colnabdiidxsa'c xcuent biuuxga te che abidxältuni jädniitu loä te näjza narä cha-gaṇäni.

⁹ Che biejn diajgreni xtidx reii, sä'tireni. Bajl nani bahuiireni lagajc lajdxreni laltis nijdni lojreni. Che bidzujnlireni cadro yu' bázga, dxejcru guzobdx bajlga.

¹⁰ Che bahuii remagos loj bajlga, rbalaz-duxhreni.

¹¹ Si'c bidzujnreni. Che biu'reni neṇ yu', bahuiireni lo bázga con xnanni Marii. Dxejcti bazuxhibreni, gojnreni bázga, baxhalreni rexcäl'nasa'creni bazalajzreni oor, näjza yaal näjza yalnejxh.

¹² Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biääd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguiil Herodes biuxe're sa'csi rlajzni ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto.

¹⁵ Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbáz

¹⁶ Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p ijz nájza rebiuxe' ni yu' guxiiru dxej, guideb neṅ guedx Belén nájza reguejdx ni re' gabiga, si'cti redxej ni rájp remagos lojni.

¹⁷ Dxejc guzojb diidx ni bacuaa Jeremías ni gunii xtidx Dios che rájpni:

¹⁸ Biejn xse' bejṅ neṅ guedx Ramá, te yälhuinuxh, te yälrbedxij, yälrbedxneṅ:
laa Raquel ni roon yejc rexi'nni.

Naaddini jiäjł lajzni sa'csi agujt rexi'nni.

¹⁹ Cheni gujt Herodes, dxejc lo te bacal huiluiloj xangl Dios loj José neṅ Egipto.

²⁰ Rájpni:

—Huistie, cua' biuxe're nájza xnanni, gubisac nez Israel sa'csi agujt renani rlajz ju't biuxe're.

²¹ Dxejcti huistie José, cua'ni biuxe' nájza xnanni. Gubi'reni Israel.

²² Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuuini ro'c. Dxejc gunisac Dios lojni loj te bacal, ni'c huijni lo reguejdx xten Galilee.

²³ Dxejc biädläjzni neṅ guejdx ni laa Nazare't te si'c guzojb diidx ni bacuaa niguii ni gunii xtidx Dios cheni rájpni: “Sirilajni nazareṅ.”

3

Juan Bautist basule' xtidx Dios loj rebejṅ

(Mr. 1:1-8; Lc. 3:1-9, 15-17; Jn. 1:19-28)

¹ Neṅ redxejga biääd Juan Bautist lo reyubijdz xten guedx Judea, ro'c cagulijdxni,

² cayäjpni:

—Colgusiechljaztu rextojltu sa'csi xcälrnibee Dios abidzungajxhni.

³ Juan najc nani basä't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh.

⁵ Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadiajgteni xtiidxni.

⁶ Che ruxhobdojlreni xtojlrni, rutiobnis Juanreni ro' gueu Jordán.

⁷ Che bahuiini siääd xhidajl reben guidoo ni najc refarisee näjza ni najc resaducee, rlajzreni gutiobnisnireni, räjpni lojreni:

—La'tu benguidxduxh, najctu si'c bäl. ¿Chu bali-jdxtu guxuntu loj xcälrdxe'ch Dios ni siääd?

⁸ Colguibaŋsa'c si'cni nungäj] te fiipac rebejn guliipac abasiechljaztu.

⁹ Na'c litis guntu xhigab naatu: “iNi nurnu najcnu rexagdoo toAbram!” Rniliä lojtu, sajc xca' Dios reguijre gunni gacreni rexi'n toAbram.

¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni.

¹¹ Narä guliicani rustiobnisä con nis si'c te seen cheni abasiechljaztu, abaxhobdojltu. Niluxh nani siääd detzä sutiobnisni la'tu con Sprit Dxaan xten Dios näjza con guiboo. Rnibeeruni loä. Beŋsacduxhni. Nicla xcura'chni digacdi chanää.

¹² Aca'ni xhi cojn gusiani triuu xtenni te chuchee triuuga nen ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

Che gurobnis Jesús

(Mr. 1:9-11; Lc. 3:21-22)

¹³ Dxejc birii Jesús nez Galilee, bidzujñni ro' gueu Jordán cadro yu' Juan te gutiobnis Juanni.

¹⁴ Niluxh naaddi Juan gutiobnis Jesús. Räjþ Juan lojni:

—Luj nanab gutiobnislu narä, niluxh ñaj alga luj siäädlu loä te gutiobnisälu.

¹⁵ Dxejc räjþ Jesús lojni:

—Basaan gacni si'c ñaj, sa'csi nanab gusoobnu guiraa ni rlajz Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädyäjt Sprit Dxan xten Dios si'c te palom, biäjtni lojni.

¹⁷ Dxejc xhaguibaali biejn diajgreni te xse' ni räjþ:

—Dee najc xi'nä ni sanälazä. Laani rbanälazä.

4

Che huij Jesús lo reyubijdz

(Mr. 1:12-13; Lc. 4:1-13)

¹ Dxejc bejn Sprit Dxan xten Dios huij Jesús nez lo reyubijdz te nejzga nuhuañ beñdxab Jesús.

² Che gulujx bacua'n Jesús tiuu gubijdx, tiuu guxhijñ, gulaanni.

³ Sas biääd beñdxab lojni, räjþni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yältxtiil guibajñ rebejn; sibajñzani con guiraa diidx nani rnii Dios.”

⁵ Dxejcti huinä beñdxab Jesús guedx Jerusalén. Gulä'pnini jiaa yejc xques guidoro. Dxejcru räjp beñdxab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;

siliäsreni luj con ñaareni didi gacnaj ni'lu lo reguijga.

⁷ Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

⁸ Stee huält huinä beñdxab Jesús yejc te danro. Dxejcti baluini lojni guiraa reguejdx, reguedxro ni tre' lo guedxliuj näj guiraa xcälñasa'creni.

⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjp Jesús lojni:

—¡Huij nez rec beñdxab! Scree caj loj rexquijtz Dios: “Dad Xtioslistu ganlu; lojtisni chulu.”

¹¹ Dxejcti gubicaj beñdxab loj Jesús. Dxejc biääd rexangl Dios biädhuiireni Jesús.

Gusloj Jesús cayujñ xtzuunni

(Mr. 1:14-15; Lc. 4:14-15)

¹² Che biejn diajg Jesús yu' Juan neñ ladzguiib, huijni nez Galilee.

13 Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí.

14 Si'c gujc te guzojb diidx ni bacuaa Isaías ni gunii xtidx Dios:

15 Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán, Galilee cadre rbäjz rebejn nani di gac rexpen Is-rael.

16 Rebejn nani rbäjz nen te yälcäjy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

17 Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guibańsa'ctu sa'csi abidzũngajxh xcälrnibee Dios.

Che gurejdx Jesús tajp xpejn̄ni

(Mr. 1:16-20; Lc. 5:1-11)

18 Sasaj Jesús nez ro' nisdoo xten Galilee che bahuiini lo tio'p niguii. Tej̄ni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäj̄l, ni'c cacuaareni guijxh lo nisdoo.

19 Dxejcti räjp Jesús lojreni:

—Coltanajl narä. Naj riniaaztu bäj̄l, niluxh narä gunä cuedxtu rebejn̄.

20 Lagajc dxejc basa'nreni xquijxhreni te sanajlreni laani.

21 Che gudejdreni ro'c, bahuiini loj stio'p niguii, Jacob con bejtzni Juan. Yu'reni nen te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni.

²² Lagajc dxejc basa'nreni barcw nájza xtradreni te sanajlreni Jesús.

Caguluii Jesús xhidajl bejn

(Lc. 6:17-19)

²³ Sasajti Jesús guideb nez región xten Galilee, caguluiini nen tejga rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälguijdx.

²⁴ Biejn diajg reben Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yälguijdx, yälñayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixu'ñ tiejxhreni. Dxejcti basiajz Jesús rebejn̄ga.

²⁵ Xhidalduxh ben Galilee huinajl̄ni, náj reben reguedx Decápolis, nájza reben guedx Jerusalén, nájza reben Judea nájza rebejn̄ ni tre' stelaad gueu Jordán.

5

Yejc te dajn balijdx Jesucrist rebejn

¹ Che bahuii Jesús loj reben xhidajl, huä'pni yejc te dajn. Dxejcti gubig rexpejn̄ni ni gurejdxni lojni.

² Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³ —Sibaalajz rebejn nani nanchee rquinduxhreni xcälracnäj Dios, sa'csi laareni nungäj̄lreni xcälrnibee Dios.

4 'Sibaalajz rebejn nani rac-huin lajzreni xcuent rextojlreni, sa'csi sudzucaj Dios xtojlni lajzreni.

5 'Sibaalajz rebejn nani nadolajz nani rlajz guntis si'cni rnibee Dios, sa'csi sacnäj Diosreni lo xcäl_nabajnreni lo guedxliujre.

6 'Sibaalajz rebejn ni nastoocanu rliaanreni, riojlni, sa'csi rlajzreni guiba_nsa'ctisreni nez loj Dios, sa'csi sudeed Dios lojreni guiraa ni rniabreni.

7 'Sibaalajz rebejn nani rulasajz sa'reni, sa'csi sulasajzza Diosreni.

8 'Sibaalajz rebejn nani najc nayatis lastooreni rujnreni rehxigabsa'c xten Dios sa'csi suhuiireni lo Dios.

9 'Sibaalajz rebejn nani ruscuecdxilajz sabejnreni, sa'csi laareni sirilajreni rexi'n Dios.

10 'Sibaalajz rebejn nani rusutijp lajzreni che rusacsí bejnreni sa'csi nabansa'creni nez loj Dios, sa'csi xtenreni najc xcäl_rnibee Dios xhaguibaa.

11 'Col_spaalajztu che gusacsí bejntu tilnä_jreni la'tu, guiniireni guiraloj didx-xhii xcuent xtidxä.

12 Col_guibaalajz, col_balajz sa'csi xhaguibaali sunidxduxh Dios xcuent xtzauuntu. Sigajcza basacsíreni reniguii ni gubajn galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

13 Räjzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejn ni dxejc? Susälreni sejdga detz yu', suläj bejn yejcn.

14 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni.

15 Digacdi xcaguij te bajl dxejcti jiäuuni neņ te caj. Maazru huen soobni jiaa neņ te gandilieer te gusänijni loj guiraa rebeņ ni tre' neņ yu'.

16 Xcäl̄nabaṅsa'ctu najc si'c te bajl loj rebeņ guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Ruluii Jesús xcuent leii

17 Räjpzani:

—Na'c guntu xhigab siädgudzucaä leii xten to-Moisés, niclaza rediidx ni baluii redad ni gunii xtidx Dios. Xhet siäddzucaädini, narä siälä te guluiäpacni si'cni najcni.

18 Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga.

19 Ni'cni chutis ni rlanj gusaan te diidx nani caj loj leii, mase te didxbäzni, luxh ruluiini gun bejñ si'c, laani guxiduxh sajcnı lajdx Dios guibaa. Niluxh renani rucuađiajg xtidx leii, luxh rujnpacreni si'cni caj lo leii, ruluiizani leii, beṅsacduxh gacni lajdx Dios guibaa.

20 Ni'cni rniä lojtu, palga ditu gunsa'cru xtzun Dios, ditu guibaṅsa'cru loj reni najn xcuent xleii toMoisés, näjza loj rebeņ guidoo ni laa farisee, dipactu jiu' lajdx Dios xhaguibaa.

Ruluii Jesús xcuent yäl̄rdxe'ch

(Lc. 12:57-59)

21 Räjpzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jiauumi neñ latzguiib.”

²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “benayälajz” sidejdni loj yälguxhtis xten Dios, sijni gabijl cadro cayejc guiboduxh.

²³ 'Che sanälu gojn guidoo te gusa'n'luni lo bacuug, palga guinaj lajzlu yu' chu lo cadxe'chlu,

²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

²⁵ 'Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di gutedni luj lo juejz. Luxh juejz sutedni luj loj reguixhajg te gusaureni luj neñ latzguiib.

²⁶ Rniliäpac lojlu: “Dilu guirii ro'c palga dilu cue'c guiralii meel nani guiniabni lojlu.”

Ruluii Jesús xcuent yälrusquee sa'ni

²⁷ Räjpzani:

—Abiejn diajgtu guniireni galoo: “Na'c guesnäjtu gunaa nani di gac chäältu.”

²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni.

²⁹ Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl.

³⁰ Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chää guideb tiejxhlu gabijl.

*Rului Jesús xcuent yälruro'n chääł bejn
(Mt. 19:9; Mr. 10:11-12; Lc. 16:18)*

³¹ Räjzani:

—Abiejn diajgtu guniireni galoo: “Chutis niguii ni rłajz guro'n chääłni, nanabtis gudeedni te guijtz nani rni abaro'nmi chääłni.”

³² Narä rniä, niguii nani guro'n chääłni niluxh xhet dołdi bejn chääłni, niguiiga sujn gun chääłni yälgubejxh, niluxh chutis ni guchnaa gunaaga sujnzani yälgubejxh.

Rului Jesús xcuent che ria'n diidx

³³ Räjzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.”

³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios,

³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxla-jdx reiuro,

³⁶ niclaza por lagajc bitiuvejclu, sa'csi digacdi guncheelu te guichyas niclaza te guichnol, nicla tej guijch.

³⁷ Nanab guiniitisl: “Mbaj” o “Ajndi”. Palga yu' xhiru rniilu, beıdxab najc ni rujn rniiluni.

*Chanälajzni rebejn ni rdxe'ch lojni
(Lc. 6:29-30)*

³⁸ Räjzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnı lojlu.”

³⁹ Narä rniä, na'c tilnäjlu te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni.

⁴⁰ Palga yu' chu rlajz tilnäjlu te xca'ni xcamangwlu, badeedza näj xsa'cwlu lojni.

⁴¹ Palga yu' chu guinibee guulu xcargwni te kilómetro, huinäni tio'p kilómetro.

⁴² Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxoijnluni lojni, na'c gäblu: “Xhetini.”

⁴³ 'Abiejn diajgtu gunii rebeḡool: “Colchanälajz sa'tu. Colguidxe'ch loj renani rdxe'ch lojtu.”

⁴⁴ Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdiĵtu, rusacsireni la'tu,

⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebeḡsa'c sigajcza lo rebeḡ guijdx. Rujnzani riajb nisguij lo rebeḡsa'c sigajcza lo rebeḡguijdx.

⁴⁶ Palga la'tu chanälajztu lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier.

⁴⁷ Palga guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios?

⁴⁸ Colyajc beḡsa'c si'c ni najc xtadtu ni yu' xhaguibaa.

6

Ruluii Jesús xho gudeedni gojn

¹ Räjpzani:

—Na'c gusäbdiidx guntu dzunsa'c nez loj rebejn te fitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu.

² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neñ reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni.

³ Luj che gudeedlu gojn xtenlu, na'c gacbee nicla tej xamiigwlu xhi badeedlu,

⁴ te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

*Ruluii Jesucrist xho cueedx, guiniabni lo Dios
(Lc. 11:2-4)*

⁵ Räjpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglazreni rniabreni lo Dios rsiuliireni neñ reyu' cadro riel xtidx Dios, näjza guiraa resquiin, näjza nez ronejz te ruhuii rebejn xho rujnreni. Rniliäpac, acua'reni gaan xtenreni.

⁶ Naj luj cheni cueedx, guiniablu lo Dios, biu' neñ xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.

⁷ Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naarenı sa'csi sanuutis rniireni xhidajl diidx balti huält, siejn diajg Dios.

⁸ Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni.

⁹ Ni'cni scree colguinii lo Dios:

Xtadnu ni yu' xhaguibaa dxan najc lajlu.

¹⁰ Sujiääd xcälrnibeelu;

bejn si'cni rlajzlu lo guedxliujre sigajc rujnlu xhaguibaa.

¹¹ Nadxej baniidx xcu'nnu sa' ni rdaunu guira dxej.

¹² Basiäjł lajzlu redojl xtennu si'c riäjł lajznu redojl xten rebejn ni rujn dojl loonu.

¹³ Na'c gusaanlu jiaabnu xhigabguijdx,

basłaa nuure lo dojl,

sa'csi xten guejblu najc yälrnibee, yälnadip näjza yälrdimbicha' par tejpas.

Sugacni si'c.

¹⁴ Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu.

¹⁵ Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

Rului Jesús xho gucua'n bejn

¹⁶ Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni.

¹⁷ Niluxh la'tu, che rucua'ntu, colcuñ yejctu, colquiib lojtu

¹⁸ te na'c gacbee rebejn cagucua'ntu, xtadtistu suhii cagucuanxhiga'tztu. Xtadtu ni cahuii xhi

cayunxhiga'tztu suniidxni xhi xca'tu nez loj re-bejn.

Yäl'nasa'c ni yu' xhaguibaa

(Lc. 12:33-34)

¹⁹ Räj pzani:

—Na'c gapdajntu yäl'nasa'c lo guedxliujre cadro rajw reman o rbihtiejn xhixtentu, niluxh richu' gubaan rolijz bejn te rbajnreni.

²⁰ Hueenru ga'ptu xcäl'nasa'ctu xhaguibaa cadro di reman gauu, diza rehxixtentu cuibhtiejn, diza regubaan jiu' te cuanreni.

²¹ Sa'csi cadro yu' xcäl'nasa'ctu, ro'cza naga' las-tootu.

Bianij xten tiejxhtu

(Lc. 11:34-36)

²² Räj pzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij.

²³ Niluxh palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, jlinacäiboo najc guidebtu!

²⁴ 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga cagui-iltistu xcäl'nasa'ctu lo guedxliujre.

²⁵ 'Ni'cni rniä lojtu, na'c chutu yärsia' por xcäl'nabajntu, xhicha gautu, xhicha yätu, niclaza naatu xhicha lajd gajcwtu. Yäl'nabajn sajrcru lo yäl'rajw, luxh sajrcru tiejxhtu lo xhajbtu.

²⁶ Colhuiu remane' ni rtajt xhaguibaa. Direni cue'c binij, dizareni guilia' gäj, dizareni cuchee xhi gaureni neñ yu', luxh xtadtu ni yu' xhaguibaa

rudeedni xhi rajwreni. ¿Laa xhet sajcdirutu loj remane'ga, ä?

²⁷ ¿Chu tej la'tu sa'csi ru'tu yärsia' sajc tiobrutu ste bo'c jiaaru?

²⁸ ¿Xhicuent runduxhtu xhigab xcuent xhajbtu? ¿Colhuii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni.

²⁹ Narä rniä lojtu, nicla reii Salomón guideb najcwni rexhabsa'c xtenni di nisiuchee si'c rsiuchee tej reguiiga.

³⁰ Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz?

³¹ Ni'cni na'c chutu yärsia' guntu xhigab: “¿Xhicha guidaunu, xhicha guidaunu, xhicha gacwnu?”

³² Sa'csi rebejn nani di gumbee Dios xhigabtisga rujnreni, caguiilreni guiraa recosga. Niluxh xtadtu ni yu' xhaguibaa anajnni xhini'c rquiintu.

³³ Colquilxgaa yälrnibee xten Dios näjza yäl'nabaṅsa'c si'cni rlajz Dios dxejc sica'tu guiraa ni rquiintu.

³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

7

*Na'c cubeetu sa'tu
(Lc. 6:37-38, 41-42)*

¹ Räjpzani:

—Na'c cubeetu sa'tu te na'cza cubee Dios la'tu.

² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutiexhtu lo bejn, si'cza sutiexh Dios lojtu.

³ ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu?

⁴ ¿Xhicuent gäblu lo sa'lu, nädoñnu cuää guijxh ni yu' neñ balojlu, luxh dilu fii loj yagro ni yu' neñ balojlu?

⁵ Benguijdx ni rusguee, guläxgaa yagro ni yu' balojlu te gac fisa'clu te cuäälü guijxh nani yu' baloj sa'lu.

⁶ 'Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni ruläj yejc xhitis xhi cos.

Colnab, colquiiil, colgusejz rolä'
(Lc. 11:9-13; 6:31)

⁷ Räjpzani:

—Colnab lo Dios te guniidxni nani rniabtu. Colquiiilni te guidxäjltuni. Colnii rolä', te guixalni jiu'tu.

⁸ Chutis ni rniab lo Dios sica'ni nani rniabni, nani rguiiil xhi cos nez loj Dios rdxälzani nani rguiiilni; nani rusejz rolä', suxhalzarenini lojni.

⁹ '¿La yu' chu tejtü che guiniab xi'nni te yätxtiil, alga gudeedni te guij, ä?

¹⁰ O palga guiniabni te la' bäl, ¿la sudeedni te bäl?

11 Palga la'tu ni najc beṅ guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

12 'Ni'cni guira'ti cos ni rlanjtu gunnäj beṅ la'tu, sigajcza colyennäjreni, sa'csi si'c caj lo leii xten toMoisés, nājza lo diidx ni bacuaa redad ni gunii xtidx Dios.

*Rolä' xten yälṅabajṅ najc dää
(Lc. 13:24)*

13 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä beṅ lo yälṅrunijt, luxh xhidajlreni riu' nejzga.

14 Sa'csi dää najc rolä', dääza najc nezyuj nani rinä beṅ nez loj yälṅabajṅ, niluxh guxii najc renani rdxäl nezyujga.

*Ninexhsa'c ni rcaj loj te yajg rujn gumbeeni yajgga
(Lc. 6:43-44)*

15 Räjpzani:

—Colṅatiro rebeṅ nani rlanj gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najczeni, rutie'chreni beṅ si'c re'ch xiil che riädchu' loob lojreni.

16 Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb.

17 Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni.

18 Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c.

19 Guiraa reyajg nani di ninexhsa'c xcaj lojni, nanab guidinni te checni.

20 Sigajcza sajc gumbeetu beṅsa'c sa'csi rujnreni dzunsa'c.

*Xhet guiraadi bejn jiu' lo xcälṛnibee Dios
(Lc. 13:25-27)*

21 Räjpzani:

—Xhet guiraadi renani rnii, “Dad, Dad”, jiu' lo xcälṛnibee Dios xhaguibaa. Ganaxtis renani rujn si'cni rlanj Xtadä ni yu' xhaguibaa.

22 Sidzujṅ dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläenu rebēdxab, con lajzalu biennu remilagwr.”

23 Dxejc säpä lojreni: “Dina gumbeä la'tu. Colbicaj loä beṅlatsiaj.”

*Tio'p cimient
(Lc. 6:47-49; Mr. 1:22)*

24 Räjpzani:

—Chutis nani rucuardiajg diidx nani caniä, luxh ruzoob xtidxä, laani najc si'c te beṅsiṅ nani basoob rolijzni yejc te guilaj.

25 Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga.

26 Nani riejn diajgni xtidxä, luxh dini guzoob xtidxä najc si'c te beṅ gualajz nani basoob rolijzni lo yujxh.

²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejn̄ga.

²⁸ Che gulujx gunii Jesús rediidxga, lacti bidxeloj rebejn̄ rediidx ni baluiini,

²⁹ sa'csi baluiini rebejn̄ si'cpac te nani rnibee, xhet si'c ruluiidi rebejn̄ ni najn̄ leii.

8

Rusiajc Jesús te bejn̄ ni ral̄ tiejxhni

(Mr. 1:40-45; Lc. 5:12-16)

¹ Che biäjt Jesús yec dajn, xhidajl bejn̄ huinajlni.

² Dxejcti biääd te benracxhuu ni ral̄ tiejxhni nez loj Jesús. Bazuxhijbni, räjpni:

—Dad, palga rlajzlu, sajc gusiajclu narä.

³ Dxejcti basгаа Jesús ñaani, gudajnni dade'ga con ñaani, räjpni:

—Rlazä jiajclu. Siajc tiejxhlu.

Lagajc dxejc gubicaj guejdx ni ral̄ tiejxhni.

⁴ Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn̄ ni gunii to Moisés gudeed bejn̄ ni riajc, te fii rebixhojzga abiajclu.

Rusiajc Jesús te xmos capitán roman̄

(Lc. 7:1-10)

⁵ Che biu' Jesús guedx Capernaum, bidzujn̄ te capitán roman̄ nani rnibee te gayuu soldaad. Gun-abduxhni lo Jesús,

⁶ räjpni:

—Dad, xmosä naga' rolizä. Di gacdi guiniibni luxh cayanduxhni.

⁷ Räjp Jesús:

—Do'o te gusiacäni.

⁸ Dxejcti räjp capitán lojni:

—Dad, xhet sacädi; di nungäj̄l̄ jiu' guejblu rolizä. Guiniitis te diidx, siacgajc xmosä.

⁹ Narä nacäza xmos rebejn̄ ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diajg Jesús si'c, bidxeloduxhni, räjpni loj renani siädnejl̄ni:

—Rniliäpac lojtu, nicla neñ guideb reguedx Israel dina nidxälä te bejn̄ ni rililajz si'c rililajz dade're.

¹¹ Niluxh rniä, sirii xhidajl̄ benzijt nez ladjiaa, nez ladjät, te jiädcuenäjreni Abram, Isaac, Jacob lajdx Dios xhaguibaa.

¹² Luxh rebeñ Israel nani niajc xi'n Dios si'reni te laad lo yälçäjy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga biajc xmosni.

Rusiajc Jesús xnansueegr Pedr

(Mr. 1:29-31; Lc. 4:38-39)

¹⁴ Che bidzujñ Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa.

¹⁵ Dxejc gudajntis Jesús ñaani, birigajcni xliaaga. Dxejcti huistie nane'ga, gusloj cagudeedni xhi gau Jesús.

*Rusiajc Jesús xhidajl beñ racxhuu**(Mr. 1:32-34; Lc. 4:40-41)*

¹⁶ Che biu' guxhijñ, biädnäreni loj Jesús xhidajl bejn ni yu' rebendxab lotooreni; con xtiidxni gunibeeni birii guiraa rebendxabga. Basiajczani guiraa reben racxhuu.

¹⁷ Si'c bejn ni te guzojb diidx ni bacuaa todad Isaías, ni gunii xtidx Dios, che räjpni:
Lagajc laani cua'ni rexcälracxhuunu, sanäzani rexcälñayannu.

*Reni rlajz ninajl Jesús**(Lc. 9:57-62)*

¹⁸ Che bahuü Jesús tre' xhidalduxh rebejn guideb gabi cadro suga'ni, gunibeeni tednäjni rexpejn pacni stelaad ro' nis.

¹⁹ Dxejcti biääd te beñnajñ loj Jesús, räjpni:

—Mastr, sisiaäza cadrotis chäálu.

²⁰ Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹ Stee rexpejn pacni räjp lojni:

—Dad, basaan chaxgaä ladxä te chacuatpä xtadä.

²² Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni bendojl.

*Basiacdxi Jesús te beduxh**(Mr. 4:35-41; Lc. 8:22-25)*

²³ Che biu' Jesús neñ barcw, biu'za rexpejn pacni lagajc neñga.

24 Dxejc huäjs te bedonduxh lo nisdoo. Lirusiääzni barcw neṅ nisdoo. Luxh Jesús nagayejsni.

25 Dxejcti huij rexpejn̄pacni huicuäänni, räjpreni:
—Dad, gucnäj nuure te di guetnu.

26 Dxejc räjp Jesús:
—¿Xhicuent rdxejbtu, bejn̄ ni guxii rililajz?
Dxejcti huistieni, gudidxa'ni lo bej nājza lo nisdoo, te biacdxireni.

27 Dxejc bidxeloduxh rexpejn̄pacni, räjpreni:
—¿Chuni'c najc niguiire? ¡Ahuilaa xho rucuardiajg bej nājza nisdoo xtiidxni!

Rebendxab ni yu' lajdx regadarenos

(Mr. 5:1-20; Lc. 8:26-39)

28 Che bidzujn̄ Jesús stelaad nisdoo cadro najc lajdx regadarenos, tio'p bejn̄ ni yu' bendxab lastooreni biädchaglojreni Jesús. Rebejn̄ga riireni neṅ rebaa, nialazduxhrene, ni'cni rut rajcdi rdejđ nezyujga.

29 Guredxa'reni räjpreni:
—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad galđi xor̄nu, ä?

30 Nez te laad, zijte' cadro suga'reni, cayajp bejn̄ xhidalro cuch.

31 Dxejcti gunab rebendxabga loj Jesús, räjpreni:
—Palga cuäälü nuure, basaan jiu'nu neṅ recuchre.

32 Dxejcti räjp Jesús:
—Cołchäj.
Dxejcti biriireni neṅ lastoo redade'ga, huichu'reni neṅ recuchga. Dxejcti guiragajc

recuchga caguxunreni, huitejbreni ro' te guilaj, biääzreni nen nisdoo, gujttireni nen nis.

³³ Rebejn ni cayajp recuchga, baxunreni, huijreni lajdxreni, huiyeireni diidx guiraa ni guzajceni näjza ni guzajc redade' ni guyu' rebendxab lastooreni.

³⁴ Dxejcti guiraa rebenguejdxga huichaglojreni Jesús. Che bahuiireni lojni, gunabduxhreni lojni, jiunejzni lajdxreni.

9

Basiajc Jesús te bejn nani abixu'n tiejxhni

(Mr. 2:1-12; Lc. 5:17-26)

¹ Dxejcti biu' Jesús nen barcw. Gudejdni stelaad ro' nis te bidzujnmi lajdxni.

² Ro'c biädnäreni lojni te bejn nani abixu'n naani, ni'ni. Naga'ni lo te da'. Che bahuii Jesús lacti rililajzreni, räjpni loj benracxhuuga:

—¡Baspaa lajzlu xi'nä! Agubicaaj rextojllu.

³ Dxejcti gaii bennajn ni ruluii xleii Moisés cayujnreni xhigab ensilaareni, caniyaj dee Dios con rextiidxni.

⁴ Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabguijdx nen lastootu?

⁵ ¿Con ni najc guyasiru? Guiniä lo te bejn: “Agubicaaj rextojllu”, o guiniä lo te bejn: “Huistie, guzaj.”

⁶ Dec gunä te gacheetu Xi'n Dios ni gujc Niguii rajp yälrnibee lo guedxliujre te gudzucajni dojl.

Dxejcti räjpni loj benracxhuuga:

—Huistie, cua' xta'lu, huij rolijzlu.

⁷ Dxejcti huistie benracxhuuga, siini rolijzni.

8 Che bahuu rebejn lojni, bidxeloduxhreni, gulä'preni xpala'n Dios, ni badeed yälrnibeega loj rebejn.

*Che gurejdx Jesús Mateo
(Mr. 2:13-17; Lc. 5:27-32)*

9 Dxejcti birii Jesús cadro basiajcnı benracxhuu, sä'tini. Dxejc bahuini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlnı Jesús.

10 Cheni sobga' Jesús lo mex cayajwreni rolijz Mateo, biädza xhidajl rebejn nani ruquijx xcuent guiraloj, ni najc rebejn ni di gac xpen Israel, gurejzarenı lo mex näj Jesús näjza reni najc rexpejnpacni.

11 Che bahuu rebenı guidoo, ni laa refarisee, xhi cayujn Jesús, räjprenı loj rexpejnpac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

12 Che biejn diajg Jesús xhi guniireni, räjpni lojrenı:

—Rebejn nani nadaan dini guiquiin chu gusıajcnı, niluxh rebejn racxhuu ni'c rquiinrenı chu gusıajceni.

13 Colchäj te colchaseed xhi säloj diidxre ni caj loj reguijtz: “Yälrlulaslajz rlazä, dina rlazä guniidxtu guidxaa lö.” Sa'csi narä dina niädtedxä rebenısa'c, narä siädtedxä rebenıdojl te gusiechlajzrenı.

*Gunabdiidxrenı xcuent yälrucua'n
(Mr. 2:18-22; Lc. 5:33-39)*

14 Dxejcti biääd rexpejn_{pac} Juan loj Jesús räjpreni:

—Nuure con refarisee rcua'nnu xhidal huält, ¿xhicuent di rexpejn_{pac}lu gucua'n, ä?

15 Räj_p Jesús lojreni:

—Che ruch_{naa} te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

16 'Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadro biräjsga.

17 Niclaza gac guida' bincoob ne_n reguidbiejw, sa'csi reguidbiejw siräjsni dxejc sixe' bin, sinijtza reguij_{dga}. Ni'cni nanab guida' bincoob ne_n reguidcoobza, te si'c nicla tejreni di nit.

Xindxa'p Jairo näjza gunaa nani gudaj_n xhajb Jesús

(Mr. 5:21-43; Lc. 8:40-56)

18 La_l ni caniini rediidxga, biääd te dade' ni rnibee ne_n guidoo xten rexpejn_{pac} Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub _{naalu} yej_{cni} te guiba_{nsacni}.

19 Dxejcti huisu Jesús, sanäni Jairo. Näj rexpejn_{pacni} sanajlrenini.

20 Luxh guyu' te gunaracxhuu nani agujc tzubitio'p ijz cayaj_{cni} yälguidxbäii. Bidzuj_{nni} nez dejt_z Jesús, gudaj_{nni} ro' xhajbni,

21 sa'csi bej_{nni} xhigab ne_n lastooni: “Palga sajc canätis ro' xhajbni, siacä.”

22 Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yäl_rililajz xtenlu abasijclu.

Luxh lagajc dxejc biajc gunaaga.

²³ Cheni biu' Jesús rolijz dade' nani rnibee neñ xquidoo rexpen Israel, bahuiini rebejn ni roĵ bizej näjza xhidajĵ rebejn ni cabedxa' cayoon, li te biejj cayajc, dxejc

²⁴ räjpni loj rebejnğa:

—Coĵguibicaj. Nagayejstis dxa'pga, gajdni guet.

Dxejc rebejnğa alga ruxhiznäjreni Jesús.

²⁵ Cheni abirii rebejn neñ yu', biu' Jesús, gu-naazni naa dxape', dxejc huistie dxape'ga.

²⁶ Dxejcti bire'ch diidxga guiraa neñ reguejdx ni tre' nejzga.

Basijc Jesús tio'p lotiä'p

²⁷ Che birii Jesús ro'c, huinajĵ tio'p bejn ni nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸ Che bidzujĵ Jesús cadre caya'nni, gubigreni lojni. Dxejcti gunabdiidx Jesús lojreni, räjpni:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

²⁹ Dxejcti gudajnni balojreni, räjpni:

—Sugacni si'cpacni rililajztu.

³⁰ Lagajc dxejc bixal balojreni. Sas räjppac Jesús lojreni:

—Arniä, na'c chayeitu diidxre, te rut gacbeedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadro biajc baloj rebejn_{ga}, biääd sgaii bejn biädnäreni te gop loj Jesús. Yu' xp_{rit} be_{nd}xab ne_n lastoo bejn_{ga}.

³³ Che barilaagw Jesús xp_{rit} be_{nd}xab ne_n lastoo be_{ng}opga, guslogajcni caniini. Rdxeloduxh rebejn_{rajp}reni:

—Gajdpacnu guihuii sa' redzuunre lajdx rexpejn_{rajp} Israel.

³⁴ Dxejc reben_{guidoo} ni najc refarisee, räjpreni:

—Rbääni rexpr_{it} be_{nd}xab con yäl_{rn}ibee xten be_{nd}xabro.

Rulaslajz Jesús rebejn

³⁵ Gudejd Jesús guiraa reguedxro näjza reguedxbäz, basule'ni xtidx Dios ne_n reguidoo xten rexpejn_{rajp} Israel. Basääbni diidx xten xcäl_{rn}ibee Dios. Basiajczani guiraloj yäl_{rac}xh_{uu}, guiraloj yäl_guijdx ni rajc bejn ne_n reguejdxga.

³⁶ Che bahuiini loj reben_{xhidajl} biaduxhni rebejn_{ga} sa'csi rdebya' lajzreni, rac-huin lajzreni, najczeni si'c najc rexiil nani di ga'p baxtoor.

³⁷ Dxejcti räjpni loj rexpejn_{pacni}:

—Guliipac xhidalduxh be_n guedxliuj di gan xtidxä, luxh guxii najc reni guluiireni; najcni si'c gäj_l ni agojl guilia', niluxh ruti mos ni guilia'ni.

³⁸ Col_{nab} lo Dad nani najc xtenni guedxliujre te guxha_{lni} rebejn_{ni} sajc guluii reben_{guedxliujre}, gacreni si'c mos ni rlia' gäj_l.

10

Gule Jesús guitzubitio'p rexpejn_{pacni}
(Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejñpacni, badeedni yälrnibee lojreni te gurilaagwreni rexprit bendxab lastoo bejñ näjza te gusiajcreni guiraloj yälguijdx näjza yälracxhuu.

² Laj reguitzubitio'p rexpejñni ni guleni najc: Simón, ni laaza Pedr; Andrés bejtz Simón; Jacob xi'n Zebedeo; Juan bejtz Jacob;

³ Felipe; Bartolomé; Tomás; Mateo, ni najc colec-toor; Jacob, xi'n Alfeo; Lebeo ni rniireni Tadeo;

⁴ Simón, te bejñ ni yu' loj recananita; Judas Iscariote, nani bateed Jesús ladzñaa rebejñ nani rdxe'ch lojni.

*Baxhal Jesús rexpejñpacni gutie'chreni diidx
(Mr. 6:7-13; Lc. 9:1-6)*

⁵ Guitzubitio'p rebejñre baxhal Jesús. Bali-jdxnireni räjpni:

—Na'c chäätu nez cad yu' rebejñ ni di gumbee Dios. Na'c jiu'tu lajdx rebeñ samaritan.

⁶ Colchäxgaa lo rexpejñ Israel nani agunijt nen dojl.

⁷ Colchäj, colzäbdiidx lo rebejñ, colye'tz lojreni xcälrnibee Dios abidzungenajxh.

⁸ Colgusiajc beñ racxhuu, colgusiajc tiejxh re-bejñ ni ral guejch tiejxhreni, colguspajñ bengut. Colgurilaagw xpriit bendxab lastoo rebejñ. Ligaj cua'tu yälrnibee, ligajza colyejn dzuun.

⁹ Räjpzani:

—Na'c chanätu oor, niclaza pla't, niclaza coobr nen xdobdäjltu,

¹⁰ niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejñ ni rujn dzuun nungäjlx xca'ni xhi gauni.

11 Rāj̄pzani:

—Che guidzuj̄ntu xhitis te gued̄xro, xhitis te gued̄xbāz, col̄quiīl te bēnsa'c. Rolij̄ztisni col̄j̄ia'n dxej̄li ni j̄iunej̄ztu guej̄dxga.

12 Cheni j̄iu'tu neṅ̄ yu', col̄niī xtid̄x Dios lo re-bej̄nga.

13 Palga naj̄creni bej̄n ni numbee Dios, suj̄ia'n yāl̄rbedx̄ilaj̄z loj̄ rebej̄nga. Niluxh palga direni gac bēnsa'c, naaddireni xca'reni xtid̄x Dios, suguibi' yāl̄rbedx̄ilaj̄zga loj̄tu, col̄j̄iunej̄z ro'c.

14 Palga direni gusaan j̄iu'tu roliz̄re ni, palga di r̄laj̄zre ni gucuadiaj̄gre ni xtiid̄xtu, dxej̄c col̄j̄iunej̄z roliz̄z bej̄nga, o col̄j̄iunej̄z guej̄dxga, dxej̄c col̄cuij̄b guxhuj̄ ni'tu si'c te seen gul̄älaz̄re ni xtid̄x Dios.

15 Rniliǟpac loj̄tu, dxej̄ ni gun Dios xcäl̄guxhtisni, te yäl̄guxhtisroru gun Dios rebej̄nga, quela yäl̄guxhtis ni guj̄c reben̄ gued̄x Sodoma näj̄ Gomorra.

Yäl̄rusacsí ni siääd

16 Rāj̄pzani:

—¡Col̄huiire! Narä suxhalǟ la'tu si'c xile' nez loj̄ reloob, ni'cni col̄gacnasiṅ̄duxh si'c naj̄c te bäl̄, col̄yaj̄cza nadolaj̄z si'c te palom.

17 Col̄natiro rebej̄n sa'csi sutedre ni la'tu ladz̄naa rexcuxhtisre ni, siguij̄nzare ni la'tu neṅ̄ xquidoore ni.

18 Sinäz̄are ni la'tu nez loj̄ regubier, nez loj̄ reṅ̄eii xcuent rextid̄xä, te gusule'tu xtid̄xä nez loj̄re ni näj̄za nez loj̄ rebej̄n nani di gumbee Dios.

19 Cheni chanäre ni la'tu nez loj̄ reguxhtis, na'c guntu xhigab xho guiniitu, niclaza guntu xhigab

xhicha ni'c guiniitu, sa'csi lagajc Dios suniidx di-idx guiniitu orga.

²⁰ Sa'csi et la'ditu ni guinii dxejc, Sprit xten Xtadtu Dios ni yu' nen lastootu, laani guinii nen lastootu.

²¹ 'Luxh rebejn sutedreni lagajc bejtzreni ladznaa reni ju'treni. Redad sutedreni lagajc xi'nreni, rexi'n bejn sidxe'chzaren lo xcuzejnreni te ju't bejn xcuzejnreni.

²² Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yäl nabajn par tejpas.

²³ Che guirinajlreni la'tu te gusacsíreni la'tu nen te guejdx, colguxun ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiäd Xi'n Dios ni gujc Niguui.

²⁴ 'Di te bejn ni casieedgaj bejroru lo xmastrni, diza te mos gac bejroru lo xlamni.

²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee bendxab, ¿xho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Räj pzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhiga'tzdi ni di guidzujn dxej siejn diajg bejn xcuentni.

²⁷ Diidx nani rniä lojtu guxhijn, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni.

²⁸ Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn nen gabijl.

²⁹ ¿La di bejn guto' tio'p manbáz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj.

³⁰ Näjza rexquidxejclu nagab tebgajreni.

³¹ Ni'cni rniä na'c guidxejbtu; sajcrutu lo te chinaa manbáz ni rutajt.

Renani rusule' xtidx Jesucrist nez loj rebejn
(Lc. 12:8-9)

³² Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa.

³³ Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

Rlia' Jesús sa' bejn
(Lc. 12:51-53; 14:26-27)

³⁴ Räjpzani:

—Na'c guntu xhigab siädnää yälrbedxilajz lo reben guedxliujre, xhet yälrcuedxidi ni siädnää, yälrdxagdijl siädnää.

³⁵ Narä siädnää yälrdxagdijl te bi'n con xtadni; te dxa'p con xnanni; te gulijzni con xnansueegrni.

³⁶ Ni'cni lagajc resa'tu ni yu' rolijztu sidxe'chreni lojtu.

³⁷ Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä.

³⁸ Nani di guu xcrujzni, nalajznu tedni trabajw, jädnajlni narä, di gacdi gacni xpenä.

³⁹ Nani guidxäl xcäl_nabaj_nni lo guedxliujre, sunitni yäl_nabaj_n xhaguibaa. Luxh nani gunijt xcäl_nabaj_nni lo guedxliujre xcuent rextidxä, sidxäl_ni yäl_naba_nsa'c xhaguibaa.

Gaan nani xca'ni
(Mr. 9:41)

⁴⁰ Räj_pzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxha_l narä.

⁴¹ Nani guscuääz te niguii ni rnii xtidx Dios rolijzni sa'csi baxha_l Dios niguiiga, sica'za bej_nga lagajc gaan ni xca' niguii ni rnii xtidx Dios. Nani guscuääz te be_nsa'c rolijzni sa'csi be_nsa'cni, sica'zani lagajc gaan ni xca' be_nsa'cga.

⁴² Chutis nani gudeed mase te xhijgtis nis niä_lij_uj xcuentä lo rebixuere, rniliäpac lojtu, direni gunijt, sica'pacreni nani nungä_l xca'reni.

11

Renani baxha_l Juan Bautist loj Jesús
(Lc. 7:18-35)

¹ Che gulujx baluii Jesús rexpej_npacni xho gunreni dzuun, dxejcti biriini ro'c te saluiini, chasule'ni diidx lajdx rexpej_npacni.

² Juan yu' ne_n latzguiib. Che biejn diajgni xhi cayujn Jesús, baxha_lni tio'p xpej_npacni

³ te huinabdiidxreni:

—¿La luj ni najc Crist ni jiääd, ä?, o ¿la silääznu chu stee bejn?

⁴ Dxejcti badzu' Jesús diidxre räjpni:

—Coļchäj, colye'tz loj Juan recos nani riejn diajgtu, näjza recos nani ruhuiitu.

⁵ Reni di fii, ruhuiireni; reni di sa, arsiajreni, reni raļ tiejxhni, abiajc tiejxhreni; reni di jien diajg, ariejn diajgreni; rebęgut, ahuäjzreni, gubaņsacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni ruslaa bejn nen dojl.

⁶ Chicbaa renani di jieed narä.

⁷ Cheni sii rebejnğa gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biguii ni rusniib bej, ä?

⁸ ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolijz rerei.

⁹ La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beņroruni.

¹⁰ Laa Juan nani rusä't ni bacuaa lo reguijtz cadro caj scree:

Narä suxhalä te niguii nani guinii xtidxä nez lojlu; laani susucheeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te beņsacduxh loj Dios si'c ni najc Juan Bautist. Niluxh bejn nani najc beņ huinru lo xcälrnibee Dios xhaguibaa, bejnğa maazru sajcnii loj Juan.

12 'Cheni gucli dxej ni gusloj rusule' Juan Bautist diidx najli, yu'duxh reni rlaizpac jiu'reni lo xcäl̄rnibee Dios ni yu' xhaguibaa con yäl̄rdxe'ch, sas reni nadxecha' rlaizreni cuäxuuni xcäl̄nibee Dios.

13 Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist.

14 Palga rlaiztu chalilajztu, lagajc Juan najc Elías, niguii xten Dios nani bia'n diidx jiääd.

15 Nani sobdiajg diidx, gucuadiajgni.

16 '¿Xhicojn guntebloä rebejn nani tre' naj, ä? Najcreni si'c najc rebiuux nani rguijt nez lo guii cadro rdo', rbejdxreni lo sa'reni,

17 rniireni: “Biel̄nu bizej te guya'tu luxh ditu nuya'. Dxejcti biel̄nu redij ni nabaduxh luxh dizatu nioon.”

18 Sa'csi che biääd Juan dini niajw dizani niä', luxh räjp rebejn najcni te xpejn bendxab.

19 Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: “Niguiire rauxha't, rätejzani bin, najcni xamigw rebendojl̄ näjza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn Dios yuduxh xcäl̄najn Dios, ni'cni baxhal̄ni guiro'p rebejnre.

Reguejdx guyalajz

(Lc. 10:13-15)

20 Dxejcti gusloj Jesús gudil̄näjni rebenguejdx cadro benduxhni remilaagwr, sa'csi naaddireni gusiechlaizreni xtoj̄lreni, sanuutis nabaj̄nreni nen̄ dojl̄. Dxejcti räjpni:

21 —¡Gunatiru guedx Corazín! ¡Gunatiro guedx Betsaida! Paru nen̄ guedx Tiro näjza guedx Sidón

nijc remilaagwr nani gujc guedx lajdxtu, cadxejli nusiejch lajzreni xtoj_lreni, cadxejli nijcwreni nen godx, nidääb cobdäj yejcreni.

²² Luxh rniä lojtu: che guidzuj_n dxej ni gun Dios xcäl_guxhtisni, sidejdrutu castiigw loj rebej_n ni guläjz guedx Tiro näjza guedx Sidón.

²³ Luj guedx Capernaum di gunlu xhigab chäslu xhaguibaa; jiäjt nen_n baa jiajblu, sa'csi paru nen_n guedx Sodoma nijc sa' remilaagwr nani gujc guedxlajdxlu, pet najli tresijc guejdxga.

²⁴ Luxh rniä lojtu, dxej ni gun Dios xcäl_guxhtisni, trabajwduxhru tedtu loj rebej_n Sodoma.

Col_ltaa loä, te gusilajztu

(Lc. 10:21-22)

²⁵ Laa dxej_{cni} räjp Jesús:

—Rliä'pä xpala'nlu Xta_{dä}, Dad xten xhaguibaa näjza guedxliuj, sa'csi bacua'tzlu recosre lo reben_nnaj_n, lo rebej_n ni racbee, te baluiiluni loj reben_nnadolajz ni najc si'c biuxbäz.

²⁶ O'n. Guliini, Xta_{dä}, sa'csi rujnlu xhigab si'c najc hueen gacni.

²⁷ 'Guiraa recosre abaniid_x Xta_{dä} loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni.

²⁸ Col_ltaa loä guiraatu nani abadxajg, nani rsina', narä sunid_{xä} yäl_rusilajz lojtu.

²⁹ Col_guisieed guntu dzuun si'cni ruluiätu. Col_huii xho runä, xho nacä nadolajz, dizana gacä ben_nnayedx_{lajz} nen_n lastoä, ni'cni sidxäl xaimtu yäl_rusilajz.

³⁰ Sa'csi guyasi najc xtzunä ni ruluiätu, dizani gac naganduxh.

12

*Rutie' rexpejn Jesús triuu dxej ni rusilajzreni
(Mr. 2:23-28; Lc. 6:1-5)*

¹ Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejn pacni, guslojreni calädxa'reni doj lo triuu te cayajwrenini.

² Che bahuii reben guidoo ni laa farisee, räjpreni loj Jesús:

—Ahuii xho rujn rexpejn paclu dzuun nani di nungäjl gunreni dxej nani rusilajz bejn.

³ Luxh laani räjpni lojreni:

—¿La gajdtu gol xhi caj loj reguijtz xcuent ni bejn toDavid che gulannäjni rexpejn ni, ä?

⁴ Biu'reni xquidoo Dios, gudajwreni yätxtiil nani di nungäjl gauni, nicla laani, niclaza rebejn nani sanäni, sa'csi yätxtiilga rebixhojztis rajwni.

⁵ O ¿la gajdtu gol lo reguijtz xten leii cadro caj xcuent rebixhojz, ä? Laareni riu'reni neñ reguidoo dxej ni rusilajz bejn, rujnreni xtzuunreni niluxh xhet dojldi rujnreni.

⁶ Narä rniä lojtu, ree suga' tej nani saj cru loj guideoga.

⁷ Paru niacbeetu xhi säloj dee: “Yäl rulaslajz rlazä, xhet yäl rejtdi guidxaa”, ditu nucuaquij redee ni xhet bejndi.

⁸ Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani
(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni.

¹⁰ Ro'c suga' te bejn ni gubijdz te naani. Luxh sa'csi caguilreni xho gucuajireni Jesús, gusloj canabdiidxreni lojni, räjpreni:

—¿La rusaan leii gusiajcní beñracxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che gal dxej ni rusilajz bejn, ¿xhixh dini cuää xiilga neñ bisie, ä?

¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliinini, dxejc biajc naani, gujcní tebloj si'c najc stelaad naani.

¹⁴ Dxejcti birii reben guidoo ni laa farisee, bachagsa'zarení te bia'nrení diidx ju'trení Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu.

¹⁶ Dxejc räjpni lojreni:

—Na'cpac gäbrení chu najcni.

¹⁷ Si'c gujc te gusojb diidx ni gunii Isaías ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälgujxhtis xtenä lo guedxliuj.

¹⁹ Dini tilnä j bejn, dizani cuedxa';

rudza jiejni diajni xse'ni lad nezyuj.

²⁰ Dini qui'ch nicla te nijt ni cabiejc,
dizani gusuii te duxiil ni cayujn guxh,
dxejli che gunni gaan guinibeeni yälguxhtis.

²¹ Lajtisni sustioob lastoo reben ni digac xpejn
Israel.

*Rucuaquijreni Jesús rajpni yälrnibee xten ben_udxab
(Mr. 3:19-30; Lc. 11:14-23; 12:10)*

²² Dxejcti biädnäreni loj Jesús te bejn ni di fii,
dizani guinii, yu' te ben_udxab lastooni. Dxejcti
basajc Jesúsni, te gujc guniini, te gujca bahuiini.

²³ Guiraa rebejn bidxelojreni, räjpreni:

—¿Xhaa laa Xi'n toDavidni, ä?

²⁴ Che biejn diajg reben guidoo ni laa farisee
rediidxga, räjpreni:

—Bejnre rbää reben_udxab con yälrnibee xten
Beelzebú ni rnibee loj reben_udxab.

²⁵ Che gucbee Jesús xhi xhigab cayujnreni, dxejc
räjpni:

—Guiraa yälrnibee nani rlia' sa'ni sinitloj; te
guedxro sigajc te famil nani rlia' sa'reni, nani
ridilnäj sa'reni, sinitlojreni.

²⁶ Sigajca palga ben_udxab rbää saben_udxabni, silia'
sa'reni, dxejc ¿xho gac chanuu xcälrnibeereni?

²⁷ Palga narä rbää reben_udxab con yälrnibee
xten Beelzebú, ¿chu xcälrnibee rajc rbää rexpeljntu
ben_udxab, ä? Ni'cni lagajc laareni suluiireni xhet
laadi rujntu xhigab.

²⁸ Palga narä rbää reben_udxab con Xprijntu xten
Dios, guliipacni abidzujn xcälrnibee Dios lojtu.

²⁹ 'Bahuilaare. ¿Xho gac jiu' te bejn cuan rolijz
te ben_udaan, xho gac cuanni xhixten bejn_uga, palga

dini gulibxgaani beṇdaanga? Che abiliib bejṅga, sajc cuanni rehxixten bejṅga.

³⁰ 'Nani xhet yu'di xladä, rdxe'chni loä. Nani di jiädñajl narä, rutie'chni reni siädñajl narä.

³¹ 'Ni'cni rniä guira'ti dojl, guira'ti yälrusguee xte bejṅ sajc gusiäjḷ lajzni xtebtis yälrniyaj Sprit Dñan xten Dios di Dios gusiäjḷ lajzni.

³² Chutis ni guinii xhi te diidx yälrniyaj Xi'n Dios ni gujc Niguii sajc gusiäjḷ lajzni, luxh chutis ni guiniyaj Sprit Dñan xten Dios, di Dios gusiäjḷ lajzni, nicla lo guedxliujre, niclaza xhaguibaa.

*Sajc gumbeetu bejṅ xcuent diidx ni rniireni
(Lc. 6:43-45)*

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni.

³⁴ Sa' la'tu beṅguijdx ni najc si'c te bäl niälasduxh, ¿xho gac guiniitu te didxsa'c?, ni ro' bejṅ rniitis rehxigab ni yu' neṅ lastoo bejṅ.

³⁵ Te beṅsa'c rniini didxsa'c, sa'csi ganax xhigabsa'c yu' neṅ lastooni, te beṅguijdx rniitisni cosguijdx sa'csi ganax xhigabguijdx yu' neṅ lastooni.

³⁶ Narä rniäza, guiraa redidxguijdx nani rni bejṅ sudeedreni cuent lo Dios cheni gunni yälguxhtis,

³⁷ sa'csi lagajc rextiidxlu sujn guinii Dios najclu beṅsa'c, lagajc rextiidxlu sujn gunijtlu lo Dios.

*Rebeṅguijdx rniab te milagwr si'c te seen
(Mr. 8:12; Lc. 11:29-32)*

³⁸ Dxejcti rebejṅ ni ruluii xleii toMoisés näjza rebeṅ guidoo ni laa farisee, räjpreni loj Jesús:

—Mastr, nuurnu rlaiznu guihuiinu te seen; bejn te milagwr te fiinuni.

³⁹ Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios.

⁴⁰ Sa'csi lagajc si'cni guyu' Jonás xque' te bälro choñ dxej, choñ yääl, si'cza chu Xi'n Dios ni gujc Niguii neñ lastoo guedxliuj choñ dxej, choñza yääl.

⁴¹ Cheni gac yälguxhtis xten Dios pet sistie rebejn ni siääd Ninive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi rebeñ Nínive basiejch lajzreni, bia xtojlrēni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás.

⁴² Näjza rein xten rebeñ sur sistieni te fini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiaigni reyälñajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³ Räjzani:

—Cheni rii te spritdxab neñ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini.

⁴⁴ Dxejcti rujnni xhigab, naani, guibisacä cadro biriä. Cheni rbisacni ro'c, rdzujñni si'c rdzujñ te bejn neñ te yu' ni naya neñni, naliobsa'cni, sucheeni, luxh rut rbäjzdi ro'c.

⁴⁵ Dxejcti rijni, rixiini sgajdz sprit nani najc nadxuudxru lojni te jäädläznäjrenini neñ lastoo

bejn̄ga. Dxejcti rxhinduxhru bejn̄ga lojni gujcn̄i galoo. Sigajcza gac rebejn̄ ni tre' lo guedxliujre n̄aj.

Xnan Jesús con rebejtzni

(Mr. 3:31-35; Lc. 8:19-21)

⁴⁶ La_l ni caninājni rebejn̄, bidzujn̄ xnanni con rebejtzni, suga'reni rolä' r_lajzreni guiniireni lojni.

⁴⁷ Dxejcti biääd tej ni räjp loj Jesús:

—Xnanlu nājza rebejtzlu suga' rolä' r_lajzreni guininājreni luj.

⁴⁸ Laani badzu'ni diidx lo bejn̄ga räjpni:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani n̄aani nez loj rexpejn̄pacni, räjpni:

—¡Redee najc xnanä redeeza najc rebetzä!

⁵⁰ Chutis nani rujn̄ si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn̄ nani rbe'c binij

(Mr. 4:1-9; Lc. 8:4-8)

¹ Lagajc dxejga birii Jesús royu'ga, huicueni nez ro' nisdoo.

² Xhidalduxh bejn̄ bire' cadro suga'ni, sas biu'ni nen̄ te barcw, ro'c gurejni. Dxejcti rebejn̄ gurej nez lo plaii.

³ Dxejc gusloj caguluii Jesús con recuent, räjpni:

—Co_lcuadiajg. Birii te dade' ni rbe'c binij te cue'cni binij.

⁴ La_l ni cabe'cni binij yu' binij ni bitejb gajxh nez ro' nesiuj, biääd remane' ni rutajt, sas gudajwreni binijga.

⁵ Yu' binij ni bitejb nez nen reguij cadro guxii yu' yuj. Gulengajc binijga sa'csi direni nibej jiät nen yuj.

⁶ Che birii gubijdx, bigolreni sa'csi xhetiza xlobaani, dxejc gubijdzni.

⁷ Yu'za binij ni bitejb nen reguejch. Che guroob reguejchga, dini nusaan niroob regäjle', gubijdztireni.

⁸ Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojni, yu'za ni cuaj galbitzuuni loj cade tej binij ni gurej.

⁹ Nani rsobdiajg diidx gucuadiajgni diidxre.

Xhi pajr najc recuent xten Jesús

(Mr. 4:10-12; Lc. 8:9-10)

¹⁰ Dxejcti gubig rexpejn pacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

¹¹ Dxejcti badzu' Jesús diidx rajpni lojreni:

—Sacnäj Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeerenini.

¹² Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni rajpni sibicaj.

¹³ Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni.

¹⁴ Laareni najcreni si'c te soob diidx ni gunii Isaías, dade' ni gunii xtidx Dios, che räjpni: Siejn diajgpactu, niluxh xhetliidi gacbeetu, sidxelojactu, niluxh ditu fii.

15 Sa'csi gualajz rebejn_{re}, lastooreni najc si'c te guij,

di diajgreni jiejn,

luxh niä_{uza} balojreni, didi fisa'creni con balojreni,

didi jiejnza diajgreni, didi gacbeeza lastooreni,

didi gusiejch lajzreni guibi'reni loä te gusiacä lastooreni.

16 'La'tu col_{guibalaznäj} balojtu sa'csi rhuisa'ctu, riensa'cza diajgtu.

17 Rniliäpac, xhidajl redade' ni gunii xtidx Dios, näjza xhidajl be_{nsa'c} rlazduxh nuh_{uii} sa' recos ni cah_{uiitu}, luxh direni nuh_{uiini}, rlajzreni niejn diajgreni sa' rediidx nani cayejn diajgtu, luxh di diajgreni niejn_{ni}.

Rusule' Jesús xcuent bejn ni rbe'c binij

(Mr. 4:13-20; Lc. 8:11-15)

18 'Col_{cuadiajg} xhi säloj xcuent bejn nani rbe'c binij.

19 Rebejn nani ruc_{uadiajg} diidx xten xcäl_{rnibee} Dios, niluxh direni gacbeeni, najcreni si'c najc binij nani bitejb nez ro' nes_{yuj}; riääd be_{ndxab} rudzucajni rediidx nani biu' ne_n lastooni.

20 Rebinij nani bitejb nez ne_n reguij, najc si'c rebejn nani ruc_{uadiajg} diidx, gustli rca'reni diidxga,

21 luxh guxii yu' xlobaani, direni sutijp. Che rdejdreni trabajw, che rdxe'ch bejn lojreni, sa'csi ruc_{uadiajg}reni xtidx Dios, rusiejch lajzreni, rbälazni diidxga.

22 Rebinij nani gurej nen reyaguejch säloj rebejn nani rucuardiajg rextidx Dios rujnrureni te gunreni dzuun te ga'preni yäl_hna_s'c ni yu' lo guedxliujre. Dxejcti rexcäl_hna_s'c xten guedxliujre rusgueereni. Guiraa recosre rutau lo xtidx Dios nen lastoo rebejn_{re}, dini gusaan gac te cosechsa'c nen lastoo rebejn_{re}.

23 Dxejc rebinij nani rtejb lo reyusa'c, ni'c najc si'c rebejn nani rucuardiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu' za bejn ni najc si'c binij ni gujc galbitzuu.

Xcuent triuu cadre guyu' cuanguejch

24 Dxejc bij Jesús stee cuent, räjpni:

—Xcäl_hrnibee Dios xhaguibaa najc si'c te bejn nani gule'c ganax triusa'c lo xyujni.

25 La_l nagaguejs bejn_{ga}, biääd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejn_{ga}, dxejcti sääni.

26 Cheni gulejn triuuga, birii doj lojni, dxejc biricaj näjza cuanguejch ro'c.

27 Dxejcti räjp remos lo xlam_{re}ni; “Dad, ¿la et ganax triusa'c di gule'clu, ä? ¿Caxh bazaj cuanguejchre?”

28 Räjp xlam_{re}ni: “Te bejn ni rdxechlajz loä biädle'cchani.” Dxejcti gunabdiidx rexmosni räjpreni: “¿La r_lajz guejblu cholädxa'nu recuanguejchga, ä?”

29 Dxejc räjp xlam_{re}ni: “Na'c, sa'csi che guiliäädxtu cuanguejchga, nägajcza triuu guiliäädxtu.

³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen yu'."

Xcuent bedz muxhtas
(Mr. 4:30-32; Lc. 13:18-19)

³¹ Bijza Jesús stee cuent räjpni:

—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni.

³² Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäazreni lo xajcw yajgga.

Xcuent levaduur
(Lc. 13:20-21)

³³ Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo choñ mediid arin, dxejc ni'c rusaguijni guideb cojbga.

Xhicuent baluii Jesús ganaxtis con cuent
(Mr. 4:33-34)

³⁴ Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni.

³⁵ Si'c bejn ni te guzojb xtidx dade' ni gunii xtidx Dios che bacuaani lo reguijtz, räjpni:
Suiyä diidx con recuent,
suiyä diidx xcuent recos ni naga'tz che bencheeli
Dios guedxliuj.

Rusule' Jesús xcuent cuanguejch nen triuu

³⁶ Dxejcti basadiidx Jesús rebejn, biu'tini nen yu' cadro bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguui;

³⁸ loniaaga najc guedxliuj; retriusa'c najc rebejn nani najc xpejn Dios, nani rucua diajg xtiidxni; recuanguejchga najc rebejn ni najc xpejn beidxab.

³⁹ Bejn nani rdxe'ch lajz najc lagajc beidxab. Cose'ch säloj che nitloj guedxliuj; reni gutie' cose'ch najc rexangl Dios.

⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj.

⁴¹ Xi'n Dios ni gujc Niguui suxhal rexanglni te jäädgutie'reni, te jäädlääreni lo xcälrnibeeni guiraa renani rujn riajb bejn nen dojl, näjza reni rujn cosguijdx.

⁴² Susälreni rebejn ga nen te or cadro cayecduxh. Ro'c sonduxhreni, sauya'reni läijyreni.

⁴³ Dxejcti rebejsa'c sidimbicha'reni si'c gubijdx lo xcälrnibee Xtadreni. Palga sobdiajgtu, colgucuadiagsa'c.

Te cossacduxh ni naga'tz

⁴⁴ Räjzpzeni:

—Si'cza xcälrnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räj̄pzani:

—Xcäl̄rnibee Dios xhaguibaa najcza si'c najc te dad rapduxh nani caguiil perlsa'c te siini.

⁴⁶ Che bidxäl̄ni te perlsa'c, tejni sacduxh, bato'ni guiraa xhixtenni te gusiini perlga.

Guijxh ni rniaaz bäj̄l

⁴⁷ Räj̄pzani:

—Xcäl̄rnibee Dios xhaguibaa najcza si'c te guijxh ni rusäl̄ bej̄n lo nis te rniaazreni guiraloj cuaa bäj̄l.

⁴⁸ Cheni agudxajni, rbäärenini nez ro' nisdoo, te ro'c rbereni loj rebäj̄l. Rebäj̄l ni najc hueen rucheeni neñ te dxijm̄; nani di gac hueen rusäl̄renini te laad.

⁴⁹ Si'cza gac che gac fis guedxliuj; sirii rexangl Dios te sudzucajreni reben̄guijdx lo reben̄sa'c.

⁵⁰ Dxejcti susäl̄reni reben̄guijdx neñ te or̄ cadro cayecduxh; ro'c sonduxhreni, sauya'reni läjyreni.

Te ben̄ rajp

⁵¹ Dxejcti gunabdiidx Jesús lojreni, räj̄pni:

—¿La racbeetu guiraa ni caniä lojtu, ä?

Dxejcti räj̄preni:

—O', racbeenuni Dad.

⁵² Dxejcti räj̄pni lojreni:

—Cheni rsieed te bej̄n nani najn leii xcuent yäl̄rnibee xten Dios xhaguibaa, najcni si'c te lam̄ nani rajc rbää lo rexcäl̄nasa'cni recos ni nacoob, näjza recos bieju.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni.

⁵⁴ Huijni lagajc lajdxni. Ro'c gusloj caguluiini neñ xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyälñajnre? ¿Xho rajc rujnni remilagwr?

⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacobo, José, Simón con Judas.

⁵⁶ Luxh rebisiajnñi rbäjzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdxpacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist

(Mr. 6:14-29; Lc. 9:7-9)

¹ Lagajc neñ redxejga Herodes, ni laaza tetarcarca, biejn diajnñi diidx xcuent ni cayujn Jesús.

² Dxejc räjpni lo rexmosni:

—Dee najc Juan Bautist. Pet agubañsacni lo reben gut, ni'cni rajpni yälñabee te rujnni remilagwr.

³ Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden neñ latzguiib xcuent Herodías, ni gujc chääl bejtzni Felipe.

⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebeñgejdx, sa'csi guiraareni rniireni Juan najc te niguii ni rnií xtidx Dios.

⁶ Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni,

⁷ räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

⁸ Dxejcti gunaaga, abalijdx xnannini, räjpni lo Herodes:

—Loj te platón baniidx bitiuvejcx Juan Bautist.

⁹ Diidxga benhuin lastoo rei Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga.

¹⁰ Dxejcti gunibeeni biru' yejc Juan Bautist neñ latzguiib.

¹¹ Sas biädnäreni yejcni lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujñ rexpejn Juan sanäreni togoalga te huicua'tzrenini. Dxejcru huisa'nreni diidx loj Jesús.

Bayaan Jesús gaii miñ bejn

(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyu-bijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni.

¹⁴ Che birii Jesús neñ barcw, bahuiini loj xhidalduxh bejn, dxejc balazlajznireni, basiajcni rebejn nani racxhuu.

15 Cheni acayu' guxhijñ, gubig rexpejñpacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejñ te jiireni nez rerench te chasiireni xhi gaureni.

16 Räjñ Jesús:

—Xhicuent jiireni. La'tu colgudeed xhi gaureni.

17 Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjñ rajpnu.

18 Laani räjpni:

—Coltanäni ree.

19 Dxejcti gunibeeni gurej rebejñ lo guixa'. Dxejcti cua'ni guigaii yätxtiil näjza guiro'p bäjñ, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejñpacni. Dxejcti rexpejñpacni gudisrenini loj rebeñ xhidajñ.

20 Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijñ gudxajni.

21 Renani gudajw najcreni si'cti gaii miñ niguii, xhet näjdi regunaa niclaza rebuiux bigab.

Gusaj Jesús lo nisdoo

(Mr. 6:45-52; Jn. 6:16-21)

22 Sas gunibee Jesús biu' rexpejñpacni nen barcw te ganidreni tedreni stee lad nis lañni casadiidxni rebejñ.

23 Che gulujx basadiidxni rebejñ, huä'p Jesús yecdajñ te xtebni guninäjni Dios Xtadni. Che gojñ guxhijñ, ro'c sugaxteb Jesús.

²⁴ Luxh barcw galäii lo nis sasaj. Cagusnibduxh reol barcw, liriääzni lo nis sa'csi cabi' beduxh cadro sääreni.

²⁵ Rsildooru gubig Jesús, bidzujñni lojreni, siädsajni lo nisdoo.

²⁶ Che bahuii rexpejn̄pacni siädsajni lo nisdoo, bidxejbreni, räjpreni:

—Colh̄uii te fantasmni —guredxa'reni sa'csi bidxebduxhreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; col̄sutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jiälä lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús.

³⁰ Che bahuii Pedr beduxh ni cabi', bidxejbni, dxejc gusloj cayääzni neñ nisdoo. Guredxa'ni, räjpni:

—Dad, j̄gulää narä!

³¹ Lagajc dxejc gunaaz Jesús ñaani, räjpni loj Pedr:

—Guxii rajplu yäl̄rililajz. ¿Xhicuent guctio'p lajzlu?

³² Che huä'preni neñ barcw, guläzgjajc bej.

³³ Dxejcti renani sää neñ barcw bazuxhijbreni nez loj Jesús räjpreni:

—Guliipacni najclu Xi'n Dios.

*Basiajc Jesús rebeñ racxhuu guedx Genesare't
(Mr. 6:53-56)*

³⁴ Che gudejdreni lo nis, bidzujñreni nez lo reyuj xten Genesare't.

³⁵ Che biembee reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni.

³⁶ Gunabduxhreni gusaanni canreni ro' xhajtisni. Dxejcti guiraa renani gudajn xhajtisni, biajcreni.

15

Nani ruxhin bejn

(Mr. 7:1-23)

¹ Dxejcti gubig gatii rebejn nani ruluii leii näjza rebejn guidoo ni laa farisee. Siädreni guedx Jerusalén, räjpreni loj Jesús:

² —¿Xhicuent di rexpejn paclu jiu xcostrumbr rebeñgool? ¿Xhicuent direni gusoob yälrdiib ñaareni che rajwreni?

³ Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu.

⁴ Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.”

⁵ Luxh la'tu rniitu sajc gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.”

⁶ Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu.

⁷ ¡Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

8 Rebeṅguejdxre con ro'reni rliä'preni xpala'nä niluxh lastooreni zijt suga' nez loä.

9 Xliä'si rajṅreni narä, sa'csi ruluiireni si'c xtidxä reyälrnibee xten rebeṅ guedxliuj.

10 Dxejcti gurejdxni rebejṅ, räjpni lojreni:

—Colcuadiajg, colyabee.

11 Nani riu' ro' bejṅ di guxhiṅ bejṅga, sanga nani rii ro' bejṅga ni'cni ruxhiṅ bejṅga.

12 Dxejcti rexpejṅpacni gubig lojni, räjpreni:

—¿La najnlu bidxe'ch rebejṅ farisee che biejn diajgreni diidx ni guniilu?

13 Dxejc laani räjpni:

—Xhitis yajg nani di Xtaä ni yu' xhaguibaa nusuj siliädxä'ni guideb xlobaani.

14 Colgusaanreni; lotiä'preni, ruluiireni nezyuj lo salotiä'preni. Luxh palga te beṅ lotiä'p guluii canejz chää stee lotiä'p, guiro'preni sitejbreni nen te gueed.

15 Räjp Pedr loj Jesús:

—Basule' cuentre loonu.

16 Räjp Jesús:

—¿La näjza la'tu ditu gacbee, ä?

17 ¿La ditu gacbee guiraa ni rajw bejṅ ru' xque'ni, dxejcti che rdejdn xque'ni, abigo'ṅni?

18 Niluxh diidx nani rii ro' bejṅ, nen lastoo bejṅ riini; dee ni ruxhiṅ bejṅ.

19 Sa'csi nen lastoo bejṅ rii rexhigabguijdx xten rebejṅ ni rugu't sa'ni; xten rebejṅ ni rusguee gunaa; xten rebejṅ ni rusguee chää sa'ni; xten rebejṅ ni rbajn; xten rebejṅ ni rnii didxxhii lo sa'ni; xtenza rebejṅ ni rutijl sa'ni.

²⁰ Laa sa' recosre ni ruxhin bejn. Che dini gu-soob recostumbr xte yälrdiib naani, di ni'c guxhin bejn.

Te gunazit nani huililajz xtidx Jesús

(Mr. 7:24-30)

²¹ Biriiti Jesús ro'c, sääni nez región xten Tiro näjza Sidón.

²² Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beñdxab lastooni, niluxh cagusacsíduxhnini.

²³ Xhet räjpdi Jesús lojni. Dxejcti biädnaðduxh rexpejn pacni lojni, räjpreni:

—Barilaagw gunaare, didi rbedxa'ni siädnaðlñi luj.

²⁴ Dxejcti räjp Jesús lojni:

—Dios baxhañ narä lojtis xpeñ Israel nani agunijt nen dojl.

²⁵ Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejn xcuxtiil rexi'nni gusañlñi lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸ Dxejcti räjp Jesús lojni:

—Nane', lacti guroob najc xcälñrililajzlu. Sugac si'cni rlajzlu.

Lagajc dxejc biajc xindxa'pni.

Basiajc Jesús xhidal beṇ racxhuu

²⁹ Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni.

³⁰ Xhidajl beṇ bidzujṇ cad sobga'ni. Siädnäreni rebeṇ ni rajc ni'ni, rebeṇ ni najc lotiä'p, rebeṇ gop, rebeṇ ni xheti ṇaani, näjza xhidalro beṇ racxhuu, bidzuṇnäjrenini nez loj Jesús. Dxejcti basiajc-nireni.

³¹ Ni'cni lacti bidxeloduxh rebeṇ xhidajlga che bahuiireni rnii regop, riajc reni xheti ṇaani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpēṇ Israel.

Badeed Jesús xhi gudajw tajp miḷ bejṇ

(Mr. 8:1-10)

³² Gurejdx Jesús rexpejṇpacni räjpni lojreni:

—Riaä rebejṇre sa'csi agujc choṇ dxej yunäjreni narä luxh xhet ca'direni gaurenì. Di rlazä guxhaläreni jiireni rolijzreni palga gajdreni gau didi guidxajgreni lo nezyuj.

³³ Dxejcti räjp rexpejṇpacni lojni:

—¿Xho guidxälṇu xhi gau rebeṇ xhidajlre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejṇ lo yuj.

³⁶ Dxejc cua' Jesús guigajdz yätxtiilga näjza rebäjḷ, badeedni xquixtios lo Dios dxejc gula'ni reyätxtiilga näjza rebäjḷga badeednireni loj rexpejṇpacni. Dxejcti laareni gudisreni yätxtiilga con rebäjḷga lo rebejṇ xhidajlga.

³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijm̄ni.

³⁸ Renani gudajwga najc si'cti tajp mīl bejn, niluxh xhet näjdi regunaa niclaza rebiuux bigab.

³⁹ Dxejcti basadiidx Jesús rebejn, biu'tini nen barcw te gudejdni lo nisdoo nez región xten Magdala.

16

Reben̄ guidoo ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

¹ Refarisee näjza resaducee bidzujnreni lo Jesús, gunabreni gunni te milagwr, gudeedni te seen ni rien̄ xhaguibaali. Niluxh cagusguesireni, sa'csi rlanjreni guiga' Jesús.

² Dxejct badzu' Jesús diidxre räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.”

³ Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseem ni rien̄ xhaguibaa, luxh ditu gumbee xhi säloj reseem xcuent redxejre, nalajznu recos ni cayajc.

⁴ Reben̄ guiidxre, reben̄ gualajz rniab te senro, te milagwr, luxh dirureni fii stee milagwr; suhui-itisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr. 8:14-21)

⁵ Che gudejd rexpejn_{pacni} stelaad nisdoo biäl-lajzreni ninäreni yätxtiil.

⁶ Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

⁷ Dxejcti bejnreni xhigab nen lastooreni: “Si'c caniini sa'csi dinu niopnä yätxtiil.”

⁸ Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¡Huinduxh najc xcälrlilajztu!

⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii mił bejn, ä? ¿Bal dxijmni batie'tu, ä?

¹⁰ ¿La diza lajztu guizaj che gudisä gajdz yätxtiil gudajw tap mił bejn, ä? ¿Bal dxijmni batie'tu?

¹¹ ¿Xhicuent ditu gacbee et yätxtiildi cagusä'tä cheni caniä lojtu colnati levaduur xten refarisee näjza resaducee?

¹² Dxejcru gucbeereni dini niäjp: “Colnati levaduur xten yätxtiil.” Laani caniini: “Colnaáti yälrlului xten refarisee näjza resaducee.”

Bicäjp Pedr Jesús najc Cristpac

(Mr. 8:27-30; Lc. 9:18-21)

¹³ Che bidzujn Jesús región xten Cesarea xten guedx Filipo, gunabdiidx Jesús loj rexpejn_{pacni}, räjpni:

—¿Chu naj rebejn nacä narä Xi'n Dios ni gujc Niguii?

¹⁴ Laareni räjpreni:

—Yu'reni naj luj najclu Juan Bautist; yu'zareni rniü luj najclu Elías, peta sgaiireni rniü luj najclu Jeremías o stee niguii ni rniü xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajñ.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejn̄di baluii dee lojlu, Xtaðätis ni yu' xhaguibaa baluiinini lojlu.

¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtiejlu guidxagsa'za renani rililajz xtidxä, niluxh che guetreni, direni nitloj.

¹⁹ Narä gunidxä yäl̄rnibee lojlu te gulijdxlu re-bejn̄ nani ahuililajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejn̄pacni laani najc Guejb Crist.

Gunii Jesús xho guetni

(Mr. 8:31-9:1; Lc. 9:22-27)

²¹ Lagajc dxejc gusloj cagusule' Jesús diidx lo rexpejn̄pacni, guniini lojreni xho nanabpac chääni guedx Jerusalén te ro'c tedni trabajwduxh ladzñaa rebengool xten guidoo, ladzñaa rebixhojz, näjza re-bejn̄ ni najn xleii Moisés. Guniizani sugu'trenini, niluxh ni riojn̄ dxej sibañsacni lo rebengut.

²² Dxejcti huinä Pedr Jesús te laad, gusloj cadilñäjnini, räjpni:

—¡Gacnäj Dioslu, Dad! ¡Gurniälojlu gaclu si'c!

²³ Dxejc gubiré Jesús, räjpni lo Pedr:

—¡Gubicaj loä beṅdxab! Na'c rusiejytislu loä. Luj dilu gun xhigab xten Dios, alga xhigab xten re-beṅguedxliuj rujnlu.

²⁴ Dxejcti räjp Jesús loj rexpejn̄pacni:

—Palga yu' chu tejtü rlaǰz guirinajl narä, su-cuälazni lagajc laani, suguuni xcrujzni, nalajznu tedni trabajw, suǰiädnaǰlni narä.

²⁵ Sa'csi nani rlaǰz gunni gaan xcäl̄nabaj̄n̄ni, suni-jtnini. Luxh nani runijt xcäl̄nabaj̄n̄ni por narä, sidxäl̄ni xcäl̄nabaj̄n̄ni par teǰpas.

²⁶ Sa'csi ¿xhi gaan gun te bejn̄ palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn̄ te siini xaimni?

²⁷ Sa'csi narä Xi'n Dios ni gujc Niguui siälä lo yäl̄rdimbicha' xten Xtaďä con rexanglni, dxejcti siguixä tebgaj bejn̄ si'ctis ni gujc xtzuumni.

²⁸ Rniliäpac lojtü, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguui lo xcäl̄rnibeä.

17

Chuni'c najc guroob

(*Mr. 9:2-13; Lc. 9:28-36*)

¹ Che gudeed xho'p dxej, huinä Jesús Pedr, Jacoob, con Juan betz Jacoob, xtebreni huijreni jiaa yejç te dajñ.

² Dxejcti nez lojreni bidxaa xho rujñ lojñi. Lojñi gusloj rdimbicha' si'c gubijdx; xhajbni gujc nolbäj si'c te bajl.

³ Dxejç bahuigajçreni loj Moisés näǰza loj Elías, cayujyreni diidx con Jesús.

⁴ Dxejcti räjp Pedr loj Jesús:

—Dad, ¡huenduxh suga'nu ree! Palga rrlajzlu, sajc jiennu choñ yuguixh, tejni gac xten guejblu, steeni gac xten Moisés, steeni gac xten Elías.

⁵ La_lni canii Pedr, biäjt te za ni rdimbicha' guideb gabireni; neñ zaga biejn te xse' ni räjp:

—Dee najc xi'nä ni sanälazä, ruspduxhni lazä, colcuadiajg xtiidxni.

⁶ Che biejn diajg rexpejn_{pac} Jesús diidxga, bazuxhijbreni, basajbreni lojreni lo yuj, bidxebduxhreni.

⁷ Dxejcti gubig Jesús lojreni, batzuubni ñaani yejcreni, räjpni:

—Colchasulii, na'c rdxejbtu.

⁸ Che guläs lojreni, lojtis Jesús bahuiireni, rutru suganäjdini.

⁹ Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibañsacä narä Xi'n Dios ni gujc Niguui lo rebeñgut.

¹⁰ Dxejcti gunabdiidx rexpejn_{pac}ni lojni:

—¿Xhicuent rnii rebejn ni najn xleii Moisés ganid Elías nanab jiääd, ä?

¹¹ Badzu' Jesús diidxre, räjpni:

—Guliini siädxgaa Elías, laani gunsa'cni guira'ti,

¹² niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rrlajzreni, basacsíduxhrenini. Sigajcza gunnäjreni narä Xi'n Dios ni gujc Niguui, susacsíduxhrenei narä.

¹³ Dxejcti gucbee rexpejn_{pac}ni caniini xcuent Juan Bautist.

*Jesús basiajc te biuux ni guyu' xpej bendxab
(Mr. 9:14-29; Lc. 9:37-43)*

¹⁴ Cheni bidzujñreni cadro tre' xhidajl bejn, gu-big te bejn lojni bazuxhijbni, dxejc räjpni:

¹⁵ —Dad, balaslajz xinä sa'csi laani cayacx-huuni, rajcni yälguidxbej, rusacsíduxh yälguijdxgani, yu' huält rtejbni lo guiboo yu' huält rtejbni lo nis.

¹⁶ Biädnäáni loj rexpejnpaclu, luxh di niajcdi nusiajcrenini.

¹⁷ Jesús badzu' diidxre lojreni räjpni:

—Benjujdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¿Coltanä biuuxga ree!

¹⁸ Dxejcti gudilnä j Jesús bendxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹ Dxejc guninä j rexpejnpacni Jesús te laad, gun-abdiidxreni räjpreni:

—¿Xhicuent di niajcdi nibäänu bendxab nen lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrililajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpacktu, xhetliidi yu' ni di gacdi guntu.

²¹ Niluxh sa' bendxabre, dini guirii palga ditu guiniabduxh lo Dios, gucu'a'nzatu.

*Jesús rusule' stehuält xho guetni
(Mr. 9:30-32; Lc. 9:43-45)*

²² Lałni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladz_naa rebendoj_l te gusacsíreni narä.

²³ Niluxh sugu'treni narä, dxejc ni rioj_n dxej sibansacä lo rebengut.

Che biejn diajgreni diidxga, guc-huinuxh lajzreni.

Gudijxni impuest xten guidoo

²⁴ Che bidzuj_n Jesús näjza rexpejn_npacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr nen_n yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reim-puest, recuyo't? ¿Reben_n lajdxreni o rebenzijt?

²⁶ Badzu' Pedr diidxre räjpni:

—Rebenzijt.

Räjp Jesús:

—Ni'cni di rexi'nreni quiixni.

²⁷ Luxh te di guidxe'chreni, huij ro' nisdoo, bacuaa ansuel, gulää bäj_l ni guiniazxgaalu. Ro' bäj_lga sidxällu te melpla't ni sajl te chatijxlu impuest xcuentä näjza xcuentlu.

18

¿Chuni'c sajcru lajdx Dios xhaguibaa?

(Mr. 9:33-37; Lc. 9:46-48)

¹ Laa dxej_nni gubig rexpejn_npac Jesús lojni te gunabdiidxreni:

—¿Chuni'c sajcru lajdx Dios xhaguibaa?

² Dxejcti gurejdx Jesús te biuxbáz, bazujnini nez galäiireni,

³ dxejc räjpni:

—Rniliápac lojtu, palga ditu gusiechlajztu, palga ditu gac nadolajz si'c te biuxbáz, ditu jiu' lajdx Dios xhaguibaa.

⁴ Ni'cni chutis bejn nani gac nadolajz si'c biuxe're, laani gac ni sajcru lajdx Dios xhaguibaa.

⁵ Chutis ni riu te sa' biuxe're, sa'csi rinälajzni narä, lagajc narä riuni.

Riezgw jiajbni nen dojl
(Mr. 9:42-48; Lc. 17:1-2)

⁶ Räjpzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te gui xten molin dojb yejnni, chatejbni loj nisdoo, palga gunni jiajb tej reni'c lo dojl.

⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rehxigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ Palga ni'lu o ñaalu gun jiajblu lo dojl, batiu'ni. Hueenru jiu'lu lo xcälñabajn Dios nitiujnglu o ñatiujnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas.

⁹ Palga te balojlu rujn riajblu lo dojl, guläani. Hueenru jiu'lu lo xcälñabee Dios najclu lotiä'p lacuaa chu guiro'p baloj chazälreni luj lo balduxh ni rejc par tejpas.

*Xcuent xiil ni gunijt**(Lc. 15:3-7)*¹⁰ Räj pza Jesús lojreni:

— Colnatiro, andi cuälaztu rebejn ni najc si'c bi-
 uxbäzre ni sasaj lo xnez Dios, sa'csi rexangl Dios
 ni cahuiireni, guiraatis dxej yu'reni loj Dios.

¹¹ Sa'csi Xi'n Dios ni gujc Niguui biääd te guslaani
 rebejn nani agunijt neñ dojl.

¹² Räj pzani:

— ¿Xho rhuiitu? Palga rajp te bejn te gayuu xiil,
 dxejc nit tejni, çlaa dini gusaan stabitzubigaaga ni
 yu' neñ gurajl te chatiilni xile' ni gunijt, ä?

¹³ Luxh palga guidxälni xile'ga, rniliä lojtu, sibal-
 azduxhruni xcuent xile'ga luxh guxiiru guibanäj
 lajzni xcuent rexiil nani di ninijt.

¹⁴ Sigajcza Xtdnu ni yu' xhaguibaa di rlaiz nit
 lo Dios nicla tej reni ahuililajz xtiidxni, ni najc si'c
 biuxbäzre.

*Xho gunnäjlu bejtzlu**(Lc. 17:3)*¹⁵ Räj pzani:

— Palga gun bejtzlu te cosguijdx lojlu, guninäjni
 xtebtislu, gojs lojni xhi dojl bejn ni lojlu. Palga saru
 gucuadiajgni xtiidxlu, abiäj lajztu.

¹⁶ Palga naaddini gucuadiajgni, dini jiu xtiidxlu,
 dxejc huinä stee o stio'p bejn chaninäjluni, te
 guiraa ni guiniitu jiejn diajg rebejnğa, te arajplu
 tio'p o choñ testiigw.

¹⁷ Palga di bejtzlu gucuadiajg xtidx rebejnğa,
 luxh dizani jiu xtiidxreni, neñ guidoo huile'c
 xquejlu loj rebejn ni ricuadiajg xtidx Dios. Palga
 dizani jiu rebeñ guidoo, sugacni nez lojlu si'c te

ben_guijdx ni di gumbee xtidx Dios o si'c rebejn nani rusquijx loj rebejn nani ruto'.

18 'Ni'cni rniliäpac lojtu, guiraa yälguxhtis xten bejn ni di gusiechlajz xtoj_lreni ni guntu lo guedxliuj, si'c jia'nni xhaguibaa; guiraa redojl nani gusiäjl lajztu lo guedxliuj sa'csi basiechlajz ben_odojlga, si'cza jia'nni xhaguibaa.

19 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni.

20 Sa'csi cadrotis nadxagsa' tio'p o cho_n bejn sa'csi rinälajzreni narä, anasuga'ä galäii rebejn_ga.

21 Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjl lazä? ¿La sajl gajdzli huält, ä?

22 Badzu' Jesús diidxre lojni räjpni:

—Dina guiniä gajdztis huält, rniä gayon_bbidzuu huält, nalajznu si'ctiza huält basiäjl lajzlu.

Xcuent tio'p bejn ni nazäab meel

23 'Xcäl_rnibee Dios xhaguibaa najc si'c te rei_i ni rlajz gunni cuent lac nazäab rexmosni lojni.

24 Agusloj cayujnni xcuentni chela bidzun_näjreni te mos ni nazäab balti mil lojni.

25 Luxh mosre xhet rajpdini te quiixni rexti'nni, ni'c gunibee rei_i guido'ni si'c slav, näjza chääl_ni, näjza rexi'nni, nägajcza guiralii xhixtenni, te gaxh xti'nni.

26 Dxejcti mosga bazuxhijbni loj xlam_ni, gunabduxhni lojni, räjpni: “Guläzsijc tiop-cho_n dxej, Dad, te gac quixä xti'nä.”

27 Dxejcti lamga balazlajzni xmosni, badzucajni guiraa ni nazääb mosga lojni, baslaanini.

28 Cheni birii mosga rolijz xlamni, bidxaagni stee samosni ni nazääb bale'si beex lojni. Gu-naaznini, baxhiya'ni yejnini, dxejc räjpni: “Gudijxga ni nazääblu loä.”

29 Dxejcti ste mosga bazuxhijbni lojni, räjpni: “Guläzsjc. Siguixäca guiraa ni nazäbä lojlu.”

30 Luxh steega naaddini, alga huisäugacni samosni nen latzguiib te bejnini gaan gudijxni guiraa ni nazääbni.

31 Cheni bahuii sgaii mos xhini'c bejnini, gucnaduxhlajzreni, huiye'tzreni lo xlamreni xhi huiyejnini.

32 Dxejcti gurejdx xlamreni mosga, räjpni lojni: “iMos guiidx! Narä badzucaä di'n ni nazääblu loä, sa'csi gunabduxhlu loä.

33 Si'cza niunnäjlu sa'lu, nulazlajzluni sigajc ni balazlazälu.”

34 Sas lacti bidxechduxh lamga, gunibeeni biäuuni te gudijxni guiragajc ni nazääbni lo xlamni.

35 Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn ni di gusiällajzpac guiraa redojl ni rujn resa'ni lojni.

19

Jesús ruluii xcuent yälru'o'n sa'ni

(Mr. 10:1-12; Lc. 16:18)

1 Che gulujx gunii Jesús recuentre, biunejnini Galilee, huijni lo región xten Judea, stelaad gueu Jordán.

2 Xhidajl bejn birinajlni, ro'c basiajnci rebenracxhuu,

3 dxejc gubig refarisee lojni, rlanjzreni guesiresireni Jesús ni'c rājpreni lojni:

—¿La sajc guro'n te niguii chäälni che rlanjztisni, ä?

4 Badzu' Jesús diidxre lojreni, rājpreni:

—¿La gajdtu gol lo reguijtz nani bacuaa to Moisés cadre caj xho benchee Dios bejn galooli: “Niguii nājza gunaa bencheenireni”?

5 Guniiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni.”

6 Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

7 Dxejcti gunabdiidxreni lojni, rājpreni:

—¿Xhicuent gunibee Moisés gudeed niguii te gui-jtz lo chäälni te si'c gac guro'nni gunaaga, ä?

8 Rājpre Jesús lojreni:

—Sa'csi najc lastootu si'c te guij, ni'c basaan to Moisés baro'n niguii chäälni, niluxh galodoo et si'cti gujnci.

9 Luxh rniä lojtu, niguii nani gusaan chäälni, luxh xhet dojl̄di bennāj chäälni stee niguii, dxejcti guchnaani ste'ca gunaa, rujnni dojl̄. Sigajcza niguii ni guchnaa gunaaga ni abaro'n chäälnini, rujnza niguiiga dojl̄.

10 Dxejc rājpre rexpejn pacni lojni:

—Palga si'c najc xluent niguii con chäälni, hueenru na'c guchnaani.

11 Jesús rājpre lojreni:

—Xhet guiraadi bejn rajc gacbee rediidxre, re-bejntis ni rudeed Dios te xcäriensa'c ni'ctis racbee.

¹² Yu' xhicuent digacdi guch_naa niguii: yu'reni digacdi guch_naa sa'csi si'c gojl'reni; yu'reni digacdi guch_naa sa'csi baxhin sabejn'reni; yu'zareni digacdi guch_naa'reni sa'csi rlanj'reni gun'reni xtzuntis Dios. Nani rajc racbeeni rediidxre, sug-acbeenireni.

*Biädnä'reni rebiuux loj Jesús
(Mr. 10:13-16; Lc. 18:15-17)*

¹³ Dxejcti biädnä'reni rebiuxe' loj Jesús te gudzuubni _naani yejcreni, guiniabni lo Dios xcuent'reni. Luxh rexpejn'pacni gudil'näj rebejn ni siädnä rebiuxe'ga.

¹⁴ Dxejc räjp Jesús loj'reni:

—Colgusaan guibig rebiuxe' loä, na'c gudxojn'tureni, sa'csi xcälrnibee Dios xhaguibaa najc xten'reni nadolajz si'c najc rebiuxe're.

¹⁵ Che gulujx badzuubni _naani yejc rebiuxe', bi-unejzni ro'c.

*Te bejn ni rajp guninäj Jesús
(Mr. 10:17-31; Lc. 18:18-30)*

¹⁶ Dxejc biääd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yäl'nabajn lo Dios par tejpas?

¹⁷ Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rlanjzlu xca'lu yäl'nabajn lo Dios, bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjl̥u bejn̥ nani di gac chäällu, na'c cuanlu, na'c guiliäslu didxxhii xcuent bejn̥.

¹⁹ Bazoob xtidx xstadlu con xnanlu, huinälajz sa'lu si'cni sanälajzlu lagajc luj.

²⁰ Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

²¹ Dxejc räjp Jesús lojni:

—Palga rlajzlu gaclu beṅsa'c lo Dios, huij, bato' guiraa ni rajplu, dxejc gudisni lo rebeṅproob, dxejc xhaguibaa sapduxhlu xhixtenlu. Dxejcti gudaa te jiädñajllu narä.

²² Cheni biejn diajg bi'nga rediidxre, guchuinduxh lajzni sa'csi rajpni xhidalduxh xhixtenni.

²³ Sas Jesús räjp loj rexpejn̥pacni:

—Rniliäpac lojtu, naganduxh jiu' te beṅ rajp loj xcäl̥rnibee Dios.

²⁴ Rnisacä lojtu, guyasiru ted te cameii neṅ baloj te guux; naganduxhru jiu' te bejn̥ ni rajp lo xcäl̥rnibee Dios.

²⁵ Che biejn diajg rexpejn̥pacni rediidxre, bidxeloduxhreni, dxejc canabdiidx loj sa'reni:

—¿Chuni'c sajc jiu' lo xcäl̥rnibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn̥ dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rniliäpac lojtu, la'tu ni biädna_jltu narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadro guinibeä lo guiraa rebe_n guedxliuj, la'tu ni siädna_jltu narä sibejzatu lo tzubitio'p yagxhil te guinibeetu loj guitzubitio'p guejdx xten rexepe_n Israel.

²⁹ Luxh guiraa rebe_n ni basa'n rolijzni o rebejtzni, o rebisiaj_nni, o xtadni, o xnanni, o chäälni, o xi'nni, o rexhujni, te siädna_jlni narä, rebe_nga sajp te gayuu huält locni gojpni, nägajc ga'preni xcäl_nabaj_n Dios par tejpas.

³⁰ Rebe_n nani rchalo najcreni be_nroru lo sa'reni nez loj Dios, reni'c gac be_n ni guxii sajc nez loj Dios. Rebe_n nadolajz ni di guchalo sajcrureni lo sa'reni, reni'c sajcrureni nez loj Dios.

20

Xcuent reni rujn dzuun

¹ Räj_pzani:

—Xcäl_nribee Dios najc si'c te be_n ni najc baxhuan xten te renchro. Rsildooru biriini te satiilni mos gun dzuun lo xyujni, lo reyaguub.

² Che bidxäl_nni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxha_nireni loj xyujni sayujnreni dzuun.

³ Birisacni, satiilni sgaii mos si'cti rcagaa, rsil. Bidxaagni sgaii be_n ni xhet cayujndi, suga'sireni nez lo guii.

⁴ Räj_pni lojreni: “Näjza la'tu colchayujn dzuun lo xyuä. Narä siguixä si'cni riäj_l xca'tu.” Sä'ti rebe_nga lo dzuun.

⁵ Birisac dade' si'cti läiidxej, birisaczani si'cti rca-
chon gudxej. Bidxaagni sgaii bejn, sigajcza räjpni
loj rebejnğa.

⁶ Dxejc si'cti rcagaii birisacni, huijni lo guii.
Ro'c bidxälni sgaii bejn ni xhet cayujndireni,
suga'sireni nez lo guii. Dxejc räjpni lojreni:
“¿Xhicuent suga'tu ree guideb dxej xhet cayujn-
ditu?”

⁷ Dxejc räjpreni lojni: “Sa'csi rut siädtildinu te
choyennu dzuun.” Dxejcti räjpni lojreni: “Näzja
la'tu colchayejn dzuun lo xyuä. Narä siguixsa'cätu.”

⁸ Che biu' guxhijn, räjp lam lo mos ni rnibee
remos: “Gurejdx remos te quixlureni. Gudix-
xгаа reni biu' gudxejru lo dzuun. Lult gudijx reni
biu' ganid lo dzuun.”

⁹ Dxejc ganid biu' remos ni agudxej biu'reni lo
dzuun. Cade tejreni cua' te denaar, si'cni rca' ni
rujn dzuun guideb dxej.

¹⁰ Cheni biu' reni biu' lo dzuun rsildoo, bejn-
reni xhigab sica'rureni meel, per sigajcza laareni
cua'reni te denaar cade tejreni.

¹¹ Che cua'reni xcuentreni gusloj cadxe'chreni
lo baxhuaan xten dzuunga.

¹² Räjpreni: “Redee ni biu' lult lo dzuun pet teb
ortis bejnreni dzuun, luxh gudijxlureni sigajcni
gudijxlu nuurnu, luxh biennu dzuun guideb dxej,
luxh biennu dzuun lo yälñanlaa.”

¹³ Dxejc räjp lamğa lo tejreni: “Xamigwä, xhet
cosguijdxdi cayunä lojlu. ¿La xhet bia'ndinu diidx
te denaar quixälu tebdxej?”

¹⁴ Huij, cua' xmeellu. Narä rlazä quixä bejnre ni
biu' lult sigajc ni gudixä lojlu.

¹⁵ ¿La di gacdi gunä si'ctis ni rlazä con xmelä? ¿O

rdxechlajzlu loä sa'csi nacä hueen, ä?"

¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpejn̄pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguui, siabä ladz̄naa reni rnibee lo rebixhojz, näjza lo rebejn̄ ni najn leii. Laareni sinibeereni guetä.

¹⁹ Suteedreni narä ladz̄naa rebenz̄ijt te cubeereni narä quiinreni narä, dxejc gucuaareni narä lo cruju. Luxh ni riojn̄ dxej, sibansacä loj reben̄gut.

Ni gunab xnan Jacob näjza Juan

(Mr. 10:35-45)

²⁰ Dxejcti gubig xnan Jacob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.

²¹ Gunabdiidx Jesús lojni:

—¿Xhini'c rlajzlu?

Räjp gunaaga lojni:

—Che jiu'lu lo xcäl̄rnibeelu, gunibelaa cue tej rexi'nä xladbeelu, steeni cue xladbäjgwlu.

²² Dxejc räjp Jesús:

—¡Ditu gan xhini'c rniabtu! ¿La sajc tedtu yäl̄rsacsí sa'ni tedä? ¿La sajc tedtu trabajwduxh sa'ni nanab tedä?

Dxejc räjpreni:

—Sajc tednuni.

23 Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yälsacsí. Et narädi cueä reni cue xladbägwä o xladbeä. Xtädä ni yu' xhaguibaa alaguleni rebejn̄ga.

24 Che biejn diajg stzuu rexpejn̄pac Jesús, bidxe'chreni loj guiro'p rexi'n nane'ga.

25 Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejn̄ga si'c xlamreni. Luxh reni najc rebenro lojreni runnäjreni rebejn̄ga si'ctis ni rlajzreni.

26 Et si'cni gunditu la'tu loj rebejn̄. Chutis rlajz gac benro lojtu, nanab gunni dzuun gacnäjni guiraliitu si'c te mos.

27 Luxh chutis tejtü ni rlajz guiliä'p xpala'nni, nanab gacni si'c xmos lo guiraliitu.

28 Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn̄, badeedzani lagajc yäl̄nabajn̄ xtenni te gudijxni baslaani xhidal bejn̄ ni yu' lo dojl̄.

*Jesús rusiajc tio'p lotiä'p
(Mr. 10:46-52; Lc. 18:35-43)*

29 Che gojl̄ guiriireni guedx Jericó, xhidalduxh bejn̄ sanajlni.

30 Dxejcti sobga' tio'p bejn̄ ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

31 Gudil̄näj rebejn̄reni, te gusäuren̄ ro'reni. Luxh laaren̄i dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lojreni:

—¿Xhini'c rlaiztu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

21

Biu' Jesús guedx Jerusalén

(Mr. 11:1-11; Lc. 19:28-40; Jn. 12:12-19)

¹ Cheni Siäddzungajxhrene guedx Jerusalén, bidzujnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejnpacni,

² räjpni lojreni:

—Colchäj loj guedxbäzre ni tre' nez lojtu. Ro'c guidxäلتu te burgunaa caduu näjza teburhuin. Colguxhecni, coltanäni löä.

³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcnini.”

⁴ Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Sión,

bahuii xreilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

⁶ Dxejcti huij rexpejnpacni, bejnreni si'c gunibee Jesús gunreni.

7 Biädnäreni bur̄ga nājza bur̄bāz xi'n̄ni. Gudixhreni xhajbreni detz bur̄bāzga, dxejc gubijb Jesús bur̄bāzga.

8 Xhidalduxh bejn̄ tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhreni rebalajg lo nez yuj cadro ted Jesús.

9 Rebejn̄ ni nijd, nājza reni siäd dejtzni gusloj cabedxa'reni, räjpreni:

—¡Xchej guibajn̄ Xi'n̄ toDavid! ¡Chicbaa ni siäd xcuent Gueb Dios! Rliä'pnu xpala'n̄ Guejblu Dios.

10 Cheni biu' Jesús nen̄ guedx Jerusalén, guiraa reben̄ guejdxga gusloj camojm̄, yu'reni canabdi-idxreni loj sa'reni:

—¿Chucha najc bejn̄re?

11 Yu'zaren̄i räjp:

—Dee najc Jesús, niguii ni rusule' xtidx Dios. Guedx Nazare't xten Galilee siädni.

Basia Jesús guidoro

(*Mr. 11:15-19; Lc. 19:45-48; Jn. 2:13-22*)

12 Dxejc biu' Jesús nen̄ guidoro xten Dios, gulääni guiraa rebejn̄ ni caguto' nājza rebejn̄ ni casii. Barexhät̄ni remex xten reni ruchaa meel xten rebejn̄, nājza reyagxhil xten reni ruto' repalom.

13 Dxejc räjp̄ni lojreni:

—Loj reguijtz ni bacuaa rebengaloo caj: “Siri-laj xquidoä yu' xten yäl̄rbejdx, yäl̄rniab loj Dios.” Niluxh la'tu abejntuni xpiliää gubaan.

14 Lagajc nen̄ guidooga, gubig loj Jesús gaii bejn̄ ni di fii nājza gaii bejn̄ ni rsiacoj, luxh basiajc-nireni.

15 Cheni bahuii reni rnibee loj rebixhojz, nājza reni najn̄ leii remilagwr ni bejn̄ Jesús, luxh biejnza diajgreni xho cabedxa' rebixue' caniireni:

“Rliä'pnu xpala'nlu Xi'n torei David”, bidxe'ch re-bixhojzga.

¹⁶ Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtü gol lo reguijtz ni bacuaa te dade' ni gunii xtidx Dios? Ro'c caj xcuent redee, cadre caj rediidxre:

Abejnlu gol rebiuux näjza rebäznite' dij ni rliäpsa'cpac xpala'n Dios.

¹⁷ Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

Te yag iigw ni gubijdz

(Mr 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Laḷ ni sääni, gusloj calaanni.

¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdí bidxäni, ganaxhtis balajg caj lo yajgga. Dxejc räjp Jesús lo yajg iigwga:

—¡Nuncru xcaj nicla tej ninejxh lojlu!

Dxejcti gubidzgajc yajgga.

²⁰ Cheni bahuii rexpejnḡpacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

²¹ Räjp Jesús lojreni:

—Rniliäpac lojtu, palga chalilajzfactu, luxh ditu gun tio'p lajztu, xhet ganaxdi sä' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni.

²² Guiraa ni guiniabtu loj Dios, palga chalilajzfactu, suniidxnini.

*Xcäl̄rnibee Jesús**(Mr. 11:27-33; Lc. 20:1-8)*

²³ Dxejcti biu' Jesús neñ guidoro, dxejc laḷ ni caguluiini rebejn̄ gubig reni rnibee loj rebixhojz nājza rebeṅgool, gunabdiidxreni lojni:

—¿Xhi yäl̄rnibee rajplu ni'cni rajc rujnlu recosre? ¿Chuni'c baniidx̄ yäl̄rnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yäl̄gunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx̄ yäl̄rnibee te runä recosre.

²⁵ ¿Chuni'c gunibee gutiobnis Juan ni rutiobnis? ¿La Dios o la beṅ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni?

²⁶ Palga jie'tznu bejn̄ guedxliuj gunibeeni, dxejc sixa't rebejn̄ yejcnu sa'csi guiraareni rililajzreni Juan najc te Dade' ni gunii xtidx Dios.

²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yäl̄rnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxey chayujnlu dzuun cadre care' uub.”

²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni.

³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij.

³¹ Loj guiro'preni, ¿chuni'c bejn si'cni rlajz xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcäl̄rnibee Dios,

³² sa'csi Juan ni rutiobnis biäd̄luini la'tu xho guibajntu, luxh ditu nililajz xtiidxni. Biäd̄la reni ruquijx guiraloj, näjza regunadxab huililaz-duxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³ 'iCōlcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcn̄i te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn̄ ni rujn̄ dzuun, sä'tini te bij zijtro.

³⁴ Che agojl guire' cose'ch baxhaḷ baxhuaanga gaii xmosni loj xyujni te chaxiireni cose'ch ni riäj̄l xca' baxhuaanga.

³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni.

36 Dxejc baxhalsac baxhuaanga sgaii mos. Niluxh reni biannäj yujga sigajcza bennäjreni remosga.

37 'Dxejcti bejn baxhuaanga xhigab: “Maazru huen guxhalä xi'nä; sucuadiajgrureni xtiidxni.”

38 Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'o guigu'tnuni te jiannänu yujre.”

39 Dxejcti gunaazrenini, guläärenini te laad, dx-
ejc bagu'trenini.

40 Dxejc gunabdiidx Jesús räjpni:

—Che jiäd baxhuaan xten yujga, ¿xhi gunnäjni rebejn nani biannäj xyujni?

41 Dxejc räjpreni loj Jesús:

—Dini gulazlajz rebeñguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjł xca'ni che gal guire' cose'chga.

42 Dxejcti räjp Jesús lojreni:

—¿La gajdtu gol lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijsa gudixhnini squiin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

43 'Ni'cni rniä lojtu, sibicaj xcälrnibee Dios lojtu, sidejdni loj rebejn nani gudeed ni riäjł xca' xcälrnibee Dios, nalajznu renani chalilajzpac xtiidxni.

44 Luxh xcuent guijsa: nani jiajb lo guijsa, silia'ni, per nani guitejb guijsa yejcni, li siujyni, gacni däj.

⁴⁵ Che biejn diajg reni rnibee lo rebixhojz nájza referisee recuent ni canii Jesús, gucbeereni cagusä'tni lagajc laareni.

⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

22

Xcuent yäl_ruchnaa

¹ Guslosac canii Jesús lojreni con recuent, räjpni:

² —Xcäl_rnibee Dios najc si'c te reii ni bejn te sa' te guchnaa xi'nni.

³ Baxhal_ni rexmosni te saxiireni regolnejdx chääreni sa', niluxh rebejn_re di rlajzdireni.

⁴ Dxejc baxhal_sacni rexmosni, räjpni: “Colye'tz loj reni abidon_, agujc comiid. ¡Abagutä balti gonsa'c, gonguro'! Anacchee guira'ti yälrajw. Coltaa.”

⁵ Niluxh reni abidonga di niu xtiidxreni. Tejni sahuu rexyujni, steeni sää lo rexnegosni,

⁶ dxejcti sgaii reni niajc biooz gunaazreni rexmos reii, basacsíreni remosga, sas bagu'trenini.

⁷ Che biejn diajg reiiga, bidxe'chduxhni, baxhal_ni rexsoldaadni te sagu'treni guiraa rebenguijdxga, te saze'czareni guejdx cadro rbäjzreni.

⁸ Dxejcti räjpni loj rexmosni: “Guiraa dee anacchee, di nungäj_l_jiäädru reni abidon_.

⁹ Colchäj, pues, lo resquiin lo nezyuj, col_cuejdx chutis bejn ni guidxaagtistu.”

¹⁰ Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc ben_hueen te gudxaj roliz reiiga.

11 'Dxejc biu' reii biädhuiini loj rebiooz. Bahuiini loj te bejn ni sobga' ro'c, luxh xhet xhablanijdini najcwni.

12 Dxejc räjp reii lojni: “Xamigwä, ¿xho bejnlu biu'lu ree luxh xhet xhablanijdilu najcwlū?” Dxi-tis sobga' bejn_{ga}, xhet rniidini.

13 Dxejc räjp reii loj rexmosni: “Colguliib ni'ni näjza naani, colsälni detzyu' cadre nacäy te ro'c gonduxhni chubejli reläjyni.”

14 Sa'csi xhidajl najc reni bidon luxh guxii najc reni bibee.

La sajc quiixni impuest

(Mr. 12:13-17; Lc. 20:20-26)

15 Dxejcti sii refarisee, bia'nreni diidx siguiilreni xho gunijt Jesús te diidx te guiga'ni.

16 Ni'c baxhalreni gaii xpejnreni näjza gaii bejn ni nadxaag Herodes te räjpreni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rnii rebejn, sa'csi dilu cue bejn ni sajcru lo stee bejn.

17 Gunii loonu, pues: ¿La laaca najc quiixnu impuest lo César ni rnibee loonu o et laadi?

18 Dxejc gucbee Jesús xhet laadi xhigab cayujnreni nen lastooreni, dxejc räjpni lojreni:

—¡Ben_guidx! ¿Xhicuent rlajztu guquiltu narä?

19 Colguluii te meel loä.

Dxejc badeedreni te meel ni laa denario.

20 Che bahuii Jesús loj meelga, gunabdiidxni lojreni, räjpni:

—¿Chuni'c caj lo meelre?

21 Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

*Canabdiidxreni xho gac che guibaṅsac rebejn
(Mr. 12:18-27; Lc. 20:27-40)*

²³ Lagajc dxejga bidzujṅ gaii reni laa saducee, reni di chalilajz sibaṅsac bejn loj rebengut. Gubi-greni loj Jesús, gunabdiidxreni,

²⁴ räjpreni:

—Mastr, si'c naj toMoisés, palga yu' te bejn ni abachṅaa, luxh ruti xi'nni che guetni, riäjł guchṅaa bejtzni biuudga te chu xi'nreni xcuent bejtzni.

²⁵ Mbaj. Loonu yu' gajdz niguii ni najc bejtz sa'reni. Betzgoolga bachṅaa, dxejc gujtṅni, luxh di xi'nni niu'. Basa'nni chääłni lo bejtzni.

²⁶ Sigajcza gusajc ni ro'p bejtzni; sigajcza gusajc ni riojṅ bejtzni. Si'c huinuu gujc che basa'li guigajdz bejtzga.

²⁷ Sas che gujt guiraareni, näjza gunaaga gujt.

²⁸ Che guibaṅsac rebejṅga lo rebengut, ¿chu tej lo rebejtzga gac chääłpac gunaaga, ni guiraareni bachṅaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälṅnibee Dios.

³⁰ Ni che guibajṅ rebengut, diru yälṅruchṅaa chu, diruza bejn gudeed rexindxa'preni guchṅaa. Dxejc sajcreni si'c rexangl Dios ni yu' xhaguibaa.

31 Dxejc xcuent yälrbansac loj rebe^{ng}gut, çla gajdtu go^l reguijtz ni bacuaa toMoisés che räjp Dios xcuent re^{ng}toxtadgoldoonu:

32 “Narä nacä Xtios Abram, Xtios Isaac, näjza Xtios Jacob”, ä? Dios di gac Xtios be^{ng}gut, Xtiostis rebe^{ng} ni nabaj^{ng} najcni.

33 Che biejn diajg rebe^{ng} xtidx Jesús, bidxeloduxh^{ng}reni diidx ni rulu^{ng}ini.

Diidx ni maazru sajc

(Mr. 12:28-34)

34 Che gucbee refarisee basäu Jesús ro' resaducee, bidojpre^{ng}ni, bachaag^{ng}reni diidx.

35 Dxejc tejreni nani najn leii, r^{ng}lajz^{ng}ni guqu^{ng}uilni Jesús ni'c gunabdiidxni lojni räjpni:

36 —Mastr, çxhi diidx ni gunibee Dios sajcru lojreni caj lo leii?

37 Räjp Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.”

38 Diidxre ni gunibee Dios najc ni sajcru, luxh ganidni siädni loj rextidx Dios.

39 Ni ro'pga sigajcza najcni: “Huinälajz resa'lu sigajc ni sanälajzlu lagajc luj.”

40 Guiro'p remandamientre nanab te guzoo^{ng} be^{ng} guiraa rediidx ni bacuaa toMoisés näjza ni bacuaa redade' nani gunii xtidx Dios.

çChu xi'n najc Crist?

(Mr. 12:35-37; Lc. 20:41-44)

41 La^{ng}ni tre' refarisee, gunabdiidx Jesús lojreni, räjpni:

42 —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

43 Räjþ Jesús lojreni:

—¿Xhicuent räjþ David “Xtadä” lojni che basanij Sprit Dxan xten Dios lastooni? Ni'c bacuaa to-David rediidxre:

44 Dad Dios räjþ lo Xtadä,
gurej xladbeä laļ ni gudzugä guiraa reni rdxe'ch lojlu ladzni'lu.

45 Palga lagajc David rnii: “Dad” lojni, ¿xho mood najcni xi'nni?

46 Dxejc rut gujcdi badzu' nicla te diidx lojni, luxh dxejliga rutru gojpdı xhi diidx niniabdi-idxrurenı lojni.

23

Rucuaquij Jesús refarisee näjza rebejn nani najn leii

(Mr. 12:38-40; Lc. 11:37-54; 20:45-47)

1 Dxejc räjþ Jesús loj rebejn xhidaalga näjza loj rexpejnþacni:

2 —Rebejn ni najn leii näjza refarisee rajp yälþnajn te gusule'reni xleii Moisés.

3 Ni'cni colguzoob guiraa rextiidxreni, na'c guntu sa' recos ni rujnreni, sa'csi laarenı rniirenı xhini'c guntu, dxejcti lagajc laarenı direni gun ni rnibeerenı guntu.

4 Rnibeerenı gun rebejn cos naganduxh ni najc si'c te cargw naduxh ni di gac guu bejn, per laarenı nicla con te bicueþaarenı direni gusniibni.

⁵ Guiraa recos ni rujnreni, rujnrenini te fiitis rebejn. Rchaglajzreni rcaj lo cuajzreni nājza rox-hajgwreni recaje' cadro yu' tla' guijtz ni caj xtidx Dios lojni. Rustioolzareni xi' xhajbreni.

⁶ Rlajzreni ganidreni tedreni lo mex che gal te lanij; rlajzreni cuereni lo rebancw ni suga' delant nen reguidobāz.

⁷ Sigajcza rlajzreni guchagro' bejn naareni nez lo guii, guiniiza rebejn “Mastr” lojreni.

⁸ 'Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu.

⁹ Na'c guiniitu “Xtadā” loj te bejn guedxliuj sa'csi yu' tejtis ni najc Xtadtu, ni'c najc Dios ni yu' xh-aguibaa.

¹⁰ Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist.

¹¹ Ni yu' si'c mos lojtu ni'c najc beņroru loj resa'ni.

¹² Sa'csi chutis ni rchaloni najcni beņro lo sa'ni, ni'c sustuiyā lojni, chutis ni najc nadolajz loj Dios, ni'c sunāni beņro lo sa'ni.

¹³ 'iProobzatu remastr xten leii nājzatu refarisee, najctu beņguijdx! Sa'csi rudxoju' jiu' rebejn loj xcāl̄rnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

¹⁴ 'iProobzatu remastr xten leii nājzatu refarisee, najctu beņguijdx! Sa'csi rudzucajtu rolijz renan-biuud lałsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

¹⁵ 'iProobzatu remastr xten leii nājzatu refarisee, najctu beņguijdx! Zijt rijtu lo renezyuj nājza lo

nisdoo te guntu gaan guchaa mase tejtis bejn xmoodni te gan̄ni Dios si'c rajntuni. Luxh che ahuililajz bejn̄ga xtiidxtu, rujntuni tio'p huält maazru te xi'n gabijl loj ni najctu.

¹⁶ 'iProobzatu, najctu si'c lotiä'p, rlanjztu guluiitu nezyuj! La'tu ni rnii palga te bejn̄ guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' neñ guidoo, dxejc sii rniliini dxejc nungäj̄l guzoobni xtiidxni.

¹⁷ iBen̄ nayääl, ben̄lotiä'p! ¿Xhini'c sajcrú? ¿La oor la guidoro ni rundxan oorga?

¹⁸ Rniizatu: “Palga te bejn̄ guiniliipacni guzä'tni lo bacuug ni yu' neñ guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäj̄l gusoobni xtiidxni.”

¹⁹ iBen̄ nayääl, ben̄lotiä'p! ¿Xhini'c sajcrú? ¿La gojn o la bacuug nani rundxan gojnga, ä?

²⁰ Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni.

²¹ Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjzza neñ guidoro ruzä'tni.

²² Sigajcza ni ruzä't guibaa che rniliipacni caguzä'tzani yagxhilo xten Dios näjza lagajc Dios ni sobga' ro'c.

²³ 'iProobzatu remastr xten leii näjzatu refarisee, najctu ben̄guijdx! Bedzxtiil, anis näjza comiñ ni rajptu, rudeedtu lo Dios tej tantga yejc cade te tzuu, niluxh ditu jiu ni sajcrú lo xtidx Dios, cadre caj xcuent yäl̄nabanya, yäl̄rulazlajz, näjza yäl̄rililajz. Deeza ni riäj̄lpac guntu lał̄ ni cayujnzatu steega.

24 ¡La'tu, lotiä'p ni rlanj guluii nezyuj! Riutu rediidx ni guxii sajc, niluxh rediidx ni sacduxh ditu jiuni, najctu si'c bejn ni rbää te rex lo xpla'tni dxejcru räjmni te cameii.

25 'iProobzatu remastr xten leii näjzatu refarisee, najctu benguijdx! Rusiatu detz bas näjza pla't luxh nenñi najc-dxuudx. Sigajcza la'tu riuduxhtu re-costumbr, luxh lastootu guidxa yälrgubaan näjza yälrdxe'chlajz.

26 Farisee ni najc lotiä'p: gudibxgaa neñ bas näjza neñ pla't, dxejc näj dejtznı sajc naya.

27 'iProobzatu remastr xten leii näjzatu refarisee, najctu benguijdx!, sa'csi najctu si'c rebaa ni nacch-esa'c; nolbäjreni, saru rluini, luxh nenñreni guidxa dzujt xte bengut näjza bälyudx.

28 Sigajcza najctu la'tu. Saru rujn lojtu, rchalo rebejn najctu beñsa'c, niluxh lastootu guidxa yälrgusgee näjza yälrguyalajz.

29 'iProobzatu remastr xten leii näjza refarisee, najctu benguijdx! Runcheetu xpaä redade' ni gunii xtidx Dios galoo, rusucheezatu ro' xpaä rebejn ni gujc beñsa'c,

30 dxejc rniitu: “Paru nibajñnu neñ redxej ni gubajñ retoxtagoldoonu dinu niacnäjä reni bagu't redade' ni gunii xtidx Dios.”

31 Lagajc con rediidxre rcäjptu najctu rexajg renani bagu't redade' nani gunii xtidx Dios.

32 ¡Colguscuääz guntu sa' recos ni guläxtiej retox-tadgoldootu!

33 'iLa'tu ni najc si'c bäl, la'tu ni najc si'c te bitiääz guidxa bälñialajz! ¿Xho guntu te na'c chäätu gabijl par tejpas?

³⁴ Ni'cni, guxhalä rexpənä ni guinii xtidxä, näjza beñnajn, näjza mastr. Luxh yu'reni sugu'ttu sucuaatureni lo cruzj; yu'zareni siguijntu neñ reguidobäz, sirinajltureni guejdx por guejdx.

³⁵ Si'cza yejctu jiajb xtiejn guiraa rebennadolajz ni bagu't bejn xchejli toAbel ni gujc nadolajz, xchejliza Zacarías, xi'n Berequías, ni bagu'ttu neñ guidoro gajxh lo bacuug.

³⁶ Rniliäpac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷ Räjpa Jesús:

—¡Jerusalén, Jerusalén! Xpejnlu rugu't redade' ni rnii xtidx Dios, rucuaazareni guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni neñ xhigani, per ditu nicäjb!

³⁸ Colhuiu xho jianxteb xquidootu cuälazrenini.

³⁹ Rnixgää lojtu, naj dirutu fii loä, dxejli che guiniitu: “Benle' Dios nani siääd xcuentni.”

24

Jesús räjp sibijl guidoro

(Mr. 13:1-2; Lc. 21:5-6)

¹ Birii Jesús neñ guidoro te asiini, dxejc gubig rexpejnpacni lojni, gusloj caguluiireni reyuduxhga lojni.

² Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

*Cos ni guluiloj gac fis**(Mr. 13:3-23; Lc. 21:7-24; 17:22-24)*

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejn_npacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa re-cosre. ¿Xhi seen guluiloj ameer jääd_ldu näjza che ameer nitloj guedxliuj?

⁴ Dxejc räjp Jesús lojreni:

—jCol_nnatiro te rut gusgueedi la'tu!

⁵ Sa'csi su' xhidajl reni jääd, naareni: “Narä nacä Crist”, luxh susgueereni xhidajl bejn.

⁶ Siejn diajgtu xcuent cadro cayajc guer, näjza xcuent cadro rlaiz chu guer, na'c guidxejbtu sa'csi si'c nungäj_l gac, niluxh gajd gal_di nitloj guedxliuj.

⁷ Sa'csi siäjs te naciön sidil_nnäjni stee naciön; te yäl_nnibee sujn guer con stee yäl_nnibee, luxh su' gubijn, su' yäl_guijdx, su'za xuduxh xhidajl lajt.

⁸ Luxh guiraa redee cuäxtiejtis retrabajwduxh ni churu chu.

⁹ 'Dxejc guteedreni la'tu ladz_naa rebend_ojl te gusacsireni la'tu, te gugu'tzaren_i la'tu, luxh guiraa rebejn sidxe'ch lojtu sa'csi sanälajztu narä.

¹⁰ Neñ redxejga, xhidajlreni sibälaz xcäl_ririlajzreni, sidxe'ch lo sa'reni, suto' sa'reni lo sa'reni.

¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn.

¹² Sa'csi lacti suduxh yäl_latsiaj lo guedxliuj, diru bejn chanälajz sa'ni.

¹³ Dxejcti bejn ni chasanäj xnezyujtis Dios, ni'c sun gaan xca'ni yäl_nabaj_n par tejpas.

14 Luxh sisiule' xtidx Dios guideb lo guedxliuj te gachee guiraa reben guedxliuj xtiidxni; dxej cru jiääd fis xten Dios.

15 'Cheni fiitu asobga' te ben guidxduxh nen yu' ni najc dxan nen guidoro, si'cni gunixgaa to Daniel ni gunii xtidx Dios gacni, bejn ni gol dee sugacbeeni nani rol ni,

16 dxej renani rbäjz lo guedx Judea, suguxunreni gucuatzlojreni nen dajn.

17 Bejn ni niä'p yej xyu'ni dxejga di gal di jäjtne te chalääni xhixteni nen xyu'ni;

18 bejn nani cayujn dzuun lo niaa, na'c guibi'ni niclaza chaxhiini xhajn.

19 ;Proobza regunaa ni nuxi'n, näjza reni cagusiä' bäs nen redxejga!

20 Colnabduxh loj Dios xhet nendi redxej ni cayacnalduxhdi nanab guxunditu, niclaza dxej che rusilajz bejn.

21 Sa'csi su' trabajwduxh nen redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni.

22 Luxh palga di Dios gutiu' yej redxejga, nicla tej bejn di laa. Luxh sutiu' Dios yej redxejga sa'csi rinälajzni reni aguleni.

23 'Nen redxejga palga yu' chu naa lojtu: "Colhuii, aree Crist", o "Colhuii ani arec", na'c chalilajztuni.

24 Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzaren senro, parsi gusgueereni, susgueduxhreni rebejn, niluxh rlajzreni gusguezaren rebejn ni agule Dios, ni rililajz

xtiidxni.

²⁵ Agunixgaä lojtu xhini'c gac.

²⁶ Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' neñ yu're”, na'c chalilajztureni.

²⁷ Sa'csi si'cni guideb xhaguibaa rien che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj.

²⁸ Ni najntu cadre naga' te mangut, ro'c re' regolbetz.

Cheni jiädsac Xi'n Dios ni gujc Niguii

(Mr. 13:24-37; Lc. 21:25-33; 17:26-30, 34-36)

²⁹ Räjpzani:

—Cuantsi ted guiraa retrabajwduxh, sicäy lo gubijdx, diruza bäii gusanij, sitejbza rebajl ni yu' xhaguibaa, sinibduxhza guideb xhaguibaa.

³⁰ Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neñ guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yälrnibee näjza yälrdimbichaduxh.

³¹ Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² 'iColguisieed ni ruluii yajg iigw! Che naren renaani che cabääni be'n, asiääd bäi curex,

³³ sigajcza cheni fiitu cayajc guiraa recosre, sacbeetu asiädgajxh fis, rolä'li abidzujjni.

³⁴ Rniliäpac lojtu, guiraa redee sajc lal ni nabajjn gaii rebejn ni suga' ree naj.

³⁵ Guibaa näjza guedxliuj sinitloj, niluxh xtidxä di nitloj.

³⁶ 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ 'Sigajcni gujc neñ redxej che gubajñ toNoé, si'cza gac che jiälä Xi'n Dios ni gujc Niguii.

³⁸ Neñ redxe galoo, cheni gajd nisguiduxhga jiajb, rebejñ ni nabajñ dxejc cayajwreni, cayä'reni, caguchñaareni, cagudeedza bejñ xindxa'preni guchña, dxejli cheni biu' Noé neñ barcwro.

³⁹ Direni niacbee xtiidxni; cheni biäädli nisguiduxh ni sanä guiraareni dxejcru gucbeereni. Sigajcza gacni che jiälsacä narä Xi'n Dios ni gujc Niguii.

⁴⁰ Neñ redxejga palga cayujñ tio'p bejñ dzuun lo niaa tejni guibee, steeni sia'n.

⁴¹ Palga cayo't tio'p gunaa xobniil, tejni guibee, steeni sia'n.

⁴² 'Ni'cni colsusin, sa'csi ditu gan xhi dxej jiääd Dad xtentu.

⁴³ Colganchee, paru niacbee baxhwaan xten yu' cor yääl niääd gubaan ni siädlan rolijzni, nisiusiñni dxejc, dini nusaan niu'ni rolijzni te cuanni.

⁴⁴ Ni'cni colsusinza la'tu, sa'csi siääd Xi'n Dios ni gujc Niguii lagajc or ni ditu gun xhigab jiäädni.

Xcuent te mossa'c näjza te mosguijdx

(Lc. 12:41-48)

⁴⁵ '¿Chuni'c najc mossa'c ni ruzoob diidx, ni basannäj xlamni rebejñ ni yu' rolijzni te gudeedni xhi gaureni ä?

⁴⁶ Chicbaa mos ni saru cayujñ xtzuunni che guidzujñ xlamni.

⁴⁷ Rniliäpac lojtu, lamga susa'nni sa' mosga te fini guiraa xhixtenni.

⁴⁸ Dxejc palga mosga di gusoob xtidx xlamni, gunni xhigab: “Sacladuxh guibi' xlamä”,

⁴⁹ dxejc guisloj cagusacsíni resamosni, guislojni gaunäjni, yänäjni rebengu.

⁵⁰ Dxejc sidzujñ xlamni dxej che dini gun xhigab jiädni, luxh or ni dini gan guidzujñni.

⁵¹ Dxejc siguinduxhni mosguijdxga, surilaagwnini te guidxagsa'ni sabenguixdni, dxejc sonduxhni, chubejli reläjyni.

25

Xcuent tzuu gunaa

¹ Räjpa Jesús:

—Pues xcälrnibee Dios najc si'c tzuu gunadxa'p nani cua' xcandilse'treni te huijreni te sa'.

² Gaii regunaaga nasin, sgaiireni nayääl.

³ Reni nayäälga sanäreni xcandilreni, niluxh direni nica' sijl se't.

⁴ Niluxh reni nasinga sanäreni sijl se't te guze'creni neñ xcandilreni.

⁵ Sa'csi bi'nga di nidzujungaj, gunaaz bacal regunadxa'pga, gudiejstireni.

⁶ Dxejc si'cti garol yääl, biejn te xse' ni räjp: “Bi'n asiääd, colchäj, colchachaglojni.”

⁷ Guiraa regunaare huistieguxuñreni, dxejc bensa'creni xcandilreni, te cuaguijreni.

⁸ Dxejc guigaii regunayääl räjpreni loj reni nasin: “Colgunidxlaa te bo'c se't gusanijnu xcandilnu, sa'csi arlajzni jiuini.”

9 Dxejcti regunanasin räjp lojreni: “Digacdini, dxejc dini gal nicla par nuurnu nicla par la'tu. Colchäj cadro ruto'reni se't colchazii xse'ttu.”

10 Lalni sasii guigaii regunaa-nayäälga se't, bidzujn bi'n. Regunaa-sin ni cabäjz bi'n biunäjrenini lo sa', biäuuti ro lä'.

11 Cheni bidzujn regunanayäälga, räjpreni: “Dad, Dad, baxhal ro lä'.”

12 Dxejc räjpni lojreni: “Rniliäpac lojtu, dina gumbeätu.”

13 Dxejc Jesús räjp lojreni:

—Col_susinza, sa'csi ditu gan nicla xhi dxej nicla xhi or siääd Xi'n Dios ni gujc Niguii.

Xcuent lam ni badeed meel

14 'Xcälrnibee Dios xhaguibaa najc si'c te bejn ni agojl guirii chääni zijt te biaj. Gurejdxni rexmosni, badeedni meel lojreni.

15 'Lo tejni badeedni si'cti gaii mil meel, lo steeni badeedni si'cti tio'p mil, dxejc steeni cua' te mil. Loj teygani badeedni si'cti ni rujnni xhigab sajc gunnäjreni dzuun, dxejcti biriini xpiajni.

16 Ni cua' gaii mil meel bejn te dzunro, bejnni gaan sgaii mil meel.

17 Sigajcza ni cua' tio'p mil meel, bejnni gaan stio'p mil.

18 Dxejcti ni cua' te mil meel, huicua'tzni xmeel xlamni nen te gueed ni gudääni lo yuj.

19 'Gudejdti balti bäii, dxejc gubi' xlam remosga, bejnni cuent loj guiraareni.

20 Che bidzujn ni cua' gaii mil meel, bidzunnäjni sgaii mil meel ni bejnni gaan, räjpni loj xlamni:

“Dad, baniidx guejblu gaii miḷ loä. Aree sgaii miḷ meel ni benä gaan.”

²¹ Räj̄p xlam̄ni lojni dxejc: “Hueenca, mos hueen najclu, rusoobzalu xtidxä. Sa'csi gujclu bensa'c con te cos bāz, naj sunidxä guinibeelu xhiroobru. Biu' loä, bibalaznäj narä.”

²² Che bidzuj̄nni ni cua' tio'p miḷ meelga, räj̄pni loj xlam̄ni: “Baniidx guejblu tio'p miḷ meel loä, aree stio'p miḷ meel ni benä gaan.”

²³ Räj̄p xlam̄ni lojni: “Mbaj. Mos hueen najclu rusoobzalu diidx. Sa'csi gujclu bensa'c con te cosbāz, naj sunidxä guinibeelu xhiroobru. Biu' loä, bibalaznäj narä.”

²⁴ Che bidzuj̄n mos ni cua' te miḷ meel, räj̄pni lo xlam̄ni: “Dad, ananä najclu te bej̄n ni di gulazlajz; rca'lu cose'ch cadre dilu nibe'c binij, rutoj̄pzalū cadre dilu nutie'ch binij.

²⁵ Ni'cni bidxebä, huicua'tzä xmeellu neḅ yuj. Niluxh axh aree xmeellu.”

²⁶ Dxejc räj̄p xlam̄ni lojni: “iMos gujdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij.

²⁷ Riäj̄l nisa'nlu xmelä neḅ te bancw te che nibi'ä nicasacä xmelä con xi'nni ni niujni gaan.”

²⁸ Dxejc räj̄pni loj reni suga' ro'c: “Col̄gudzucaj te miḷ meel ni ca'ni col̄gudeedni loj ni rajp tzuu miḷ meel.

²⁹ Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni.”

³⁰ Dxejc räj̄pni: “Col̄ca' mosre ni xhet sajcdi, col̄guzäl̄ni lo yäl̄nacäjy, cadre chu yäl̄ronduxh, näjza yäl̄rajw reläjy bej̄n.”

Yälguxhtis xten reguejdx

31 'Che jιάdsac Xi'n Dios ni gujc Niguui con yälrdimbicha' xtenni, siädnäni rexangl Dios. Dxejc sibejni lo tron ni rdimbicha' xtenni te guinibeeni.

32 Dxejc sidojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni.

33 Suzujni rexiil xladbeeni dxejc redxib xladbäjgwni.

34 Dxejc säjb rei loj reni suga' xladbeeni: “Coltaa, la'tu ni benle' Xtadä. Coljiu' lo yälrnibee ni guc-chee cheni guzoblojli guedxliuj.

35 Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadre bia'nä.

36 Che xheti xhabä, la'tu baniidxni, che gucxhuä, la'tu biädhuiitu narä, che guyu'ä nen latzguiib, biädhuiitu narä.”

37 Dxejc sinii reni suga' xladbeeni, säjbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu?

38 ¿Guc bahuiinu najclu si'c te benzijt, baniidxnu cadre bianlaalu, o biäädx xhajblu, baniidxnu xhi gojtlu?

39 O ¿guc bahuiinu cayacxhuulu, o yu'lu nen latzguiib, biophuiinu lojlu?”

40 Dxejc reiiga säjb lojreni: “Rniliäpac lojtu, xhitis xhi bejntu loj te rexpənä ni rnii xtidxä mase proobreni, lagajc loä bejntu recosga.”

41 'Dxejc säjzpzeni loj reni suga' ladbäjgwni: “Colguibicaj loä, benguijdx, colchäj lo balduxh ni

cayejc par tejpas ni cayejc par ben_{dx}ab ni rnibee nájza rexpen_{dx}abni.

⁴² Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä;

⁴³ cuanzaä si'c te ben_zijzt, luxh ditu nunid_xlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza nen_n latzguiib, niluxh ditu niädhuii loä.”

⁴⁴ Dxejc laareni säjbreni: “Dad, ¿guc bihuiinu calaanlu, o cayojllu, o canzajlu si'c te ben_zijzt, o cayääd_x xhajblu, o cayacxhuulu, o yu'lu nen_n latzguiib, luxh dinu niacnäjlü?”

⁴⁵ Dxejc säjb reiiga lojreni: “Rniliäpac lojtu, loj xhitis ni ditu niacnäj rebejn ni rililajz xtidxä, mase proobreni naräni ditu niacnäj.”

⁴⁶ Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcäl_nabajn Dios par tejpas.

26

*Bejnreni xhigab xho guiniaazreni Jesús
(Mr. 14:1-2; Lc. 22:1-2; Jn. 11:45-53)*

¹ Che gulujx gunii Jesús rediidxre, räjpni loj rexpejn_npacni:

² —Anajntu stio'p dxejtis cayääd_x gac lanij ni laa pascw. Luxh suteedreni narä, Xi'n Niguui ladz_naa reni gucuaa narä lo cruiz.

³ Dxejc bidojp rebejn ni rnibee rebixhojz, nájza remastr xten leii, nájza rebengool lo rexpejn Israel. Lo xle' Caifás, ni rnibee loj rebixhojz, bidojpreni.

⁴ Ro'c bachaagreni diidx xho guiniaazreni Jesús con yälrusguee, te ju'trenini.

⁵ Luxh räjpreni lo sa'reni:

—Na'c jiennuni nen redxe lanij, te di gun rebejn beiduxh.

Te gunaa ni biädnä perfum
(Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiajcní che ral tiejxhni,

⁷ ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús.

⁸ Che bahuii rexpejn pacni xhi cayujni, bidxe'chreni, gusloj cayäjpreni:

—¿Xhicuent casälxlia'ni perfumga?

⁹ Perfumre niajc nido'ni, nirii xhidajl meel lojni te niacnäjni rebenprob.

¹⁰ Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtú gunaare? Ni te coshúeen najc dee nani bejnni loä.

¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä lojtu.

¹² Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzá.

¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús
(Mr. 14:10-11; Lc. 22:3-6)

¹⁴ Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz,

¹⁵ räjpni:

—¿Lac guniidxtu loä te gutedä Jesús ladzn̄aatu?
Dxejc badeedreni galbitzuu melpla't lojni.

¹⁶ Dxjecli caguuil Judas xho gutedni Jesús lojreni.

Lult xchej xten Jesús

(*Mr. 14:12-25; Lc. 22:7-23; Jn. 13:21-30; 1Co. 11:23-26*)

¹⁷ Primer dxej lanij, dxej ni rajwreni yätxtiil ni di saguij, gubig rexpejn̄pacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

¹⁸ Dxejc räjpni lojreni:

—Coļchäj lo guejdx rolijz te dade', coļye'tz lojni:
“Si'c naj Dad maestr: Asiäddzungajxh xorni, ni'cni rolijzlu gaunäjni rexpejn̄ni xchej lanipascw.”

¹⁹ Bejnti rexpejn̄pacni si'cni gunibee Jesús gac, bazucheereni xchej xten pascw.

²⁰ Che biu' guxhijñ, sobga' Jesús lo mex con retzubitio'p xpejn̄pacni.

²¹ Laļ ni cayajwreni räjpni lojreni:

—Rniliä lojtu, yu' tejtü ni guto' narä.

²² Dxejc guc-huinuxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä neñ tejtis pla't, laa ni'cni guto' narä.

²⁴ Xi'n Dios ni gujc Niguüi sajc si'ctis ni caj loj guijt̄z xten Dios, per gunatiro bejn̄ ni guto'ni. Huenru na'c niajl bejn̄ga.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

26 La_l ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn_{pacni}, räjpni:

—Cołtajw; dee najc si'c tiexhä.

27 Dxejc guläsni te vas, badeedni xquixtios lo Dios, dxejcti badeednini loj rexpejn_{pacni}, räjpni:

—Guiraatu colyä',

28 sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni neñ dojl.

29 Luxh rniä lojtu, diruna yä'ä nis nani rii yejc uub, dxejlini yänäsacātu lo xcäl_{rnibee} Dios, Xtadä.

Räjp Jesús sibälaz Pedroni

(Mr. 14:26-31; Lc. 22:31-34; Jn. 13:36-38)

30 Che gulujx bilreni te dij, biriireni, sääreni lo dajn ni laa Oliib.

31 Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtz xten Dios caj scree: “Sugu'treni baxtoor dxejc sire'ch rexiiil.”

32 Dxejc cheni guibansacä lo rebengut, ganidä cha'ä región Galilee, dxejcti jiädnajltu narä.

33 Dxejc räjp Pedr loj Jesús:

—Masque guiraareni cuälazlu, narä dina cuälazälu.

34 Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgail cuedxa', luxh luj alagulälazlu narä chon huält.

35 Räjp Pedr loj Jesús:

—Masque riäj_l guetnäälu, dina cuälazälu.

Dxejc sigajcza gunii guiraa rexpejn_{pacni}.

*Gurejdx-gunab Jesús loj Dios nen Getsemaní
(Mr. 14:32-42; Lc. 22:39-46)*

³⁶ Dxejcti bidzujñ Jesús nájza rexpejn̄pacni te lajt ni laa Getsemaní, rájpn̄i lojreni:

—Colcuésijc ree laḷ ni cuedx-guiniabä lo Dios.

³⁷ Dxejc sanäni Pedr nájza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh.

³⁸ Dxejc rájpn̄i lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajcn̄i, basanlaa tedcaj trabajw-duxhre ni tedä, te na'c tedäni. Xhet si'c̄di ni rlazä gacni; si'cpacni rlanjzlu gac, si'c gacni.

⁴⁰ Dxejcti gubi'ni cadro suga' guichon̄ rexpejn̄pacni, che bidzujñni ro'c, nagayejsreni. Rájpn̄i lo Pedr:

—¿La di niajcdi nutie'chtu bacal lojtu nicla tebor, ä?

⁴¹ Colguibajn̄, colnab lo Dios te na'c jiajbtu nen dojl. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, rájpn̄i:

—Xtadä, palga digacdi tedcaj tedä trabajwre, sugacni si'ctis ni rlanjzlu gacni.

⁴³ Dxejc gubisacni, bidxäl̄ni rexpejn̄pacni, nagayejsreni sa'csi yuduxh bacal lojreni.

⁴⁴ Basaannireni, dxejc säsacni, gurejdx-gunabni lo Dios ni riojn̄ huält, gunisacni lagajc rediidx ni guniini galoo.

⁴⁵ Dxejc huijni cadro suga' rexpejn_{pacni}, räjpni lojreni:

—iNaj sii, colguejs, colgusilajz! Abidzujn or ni gut-edreni Xi'n Dios ni gujc Niguui ladz_{naa} rebendojl.

⁴⁶ iColchastie, colcho', colhuii! Asiääd nani guted narä ladz_{naa} rebendojl.

Gunaazreni Jesús sanärenini pres

(Mr. 14:43-50; Lc. 22:47-53; Jn. 18:2-11)

⁴⁷ Lalni canii Jesús bidzujn Judas, nani najc tej retzubitio'p xpejn_{pacni}. Bidzun_{näjni} xhidalduxh bejn ni ca' espaad, ni ca' garo't, najcreni xpejn reni rnibee rebixhojz, näjza xpejn rebengool xten rexpejn Israel.

⁴⁸ Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgajcni.

⁴⁹ Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni.

⁵⁰ Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

⁵¹ Per tej reni suganäj Jesús gulääni te spaad, batiu'ni diajg te mos xten rebixhojz ni rnibee.

⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni.

⁵³ ¿La ditu gan sajza guiniabä lo Xtadä, luxh laani suxhalgajcni gayon_{bitzubitio}'p mil xanglni gacnäj narä?

⁵⁴ Dxejc xho gac soob diidx ni caj lo reguijtz xten Dios ni rnixgaa riäjĵ gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädnätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu nen guidoro, luxh ditu niniaaz narä.

⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn pacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojp guiraa rebejn nani ruluii leii näjza rebeṅgool xten xpejn Israel.

⁵⁸ Dxejcti zit-zijt biädnajl Pedr rebejnğa, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fini xhini'c gac.

⁵⁹ Reni rnibee rebixhojz, näjza rebeṅgool con guiraa reni rajp yälrnibee gusloj caguuilreni xhitis te diidx, masque xhet guliidini, te gucuaquijreni Jesús te guinibeereni guetni.

⁶⁰ Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii,

⁶¹ räjpreni:

—Niguiire gunii scree: “Narä sajc gutzulä guidoro xten Dios, sajcza gunchesacäni neṇ chon dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicient xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajṇ. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jlälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—¡Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni.

⁶⁶ ¿Xhi rchalotu?

Dxejc basejcreni diidx:

—¡Abiga'ni! Riäjḷ guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni,

⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Laḷ ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejñni; huenliisi riejn diidx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgaii.

⁷⁵ Dxejcru banalajz Pedr rediidx ni gunii Jesús lojni che räjpni: “Che gajdli guidgaii cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(*Mr. 15:1; Lc. 23:1-2; Jn. 18:28-32*)

¹ Che bianij lo guedxliuj, guiraa reni najc rebix-hojz ni rnibee näjza rebeñgool xten rexpejñ Israel bia'nreni diidx xho gunreni ju'treni Jesús.

² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool.

⁴ Räjpnj:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj neñ guidoro, biriitini ro'c. Sas huijni, baliibni te duu guejnni, gojlni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälnu meelre neñ caj gojn sa'csi najcni xcuent xtiejn te bejn.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt.

⁸ Ni'cni najli rniireni yujga: “Yurejn”.

⁹ Si'c gusojb diidx ni gunii Jeremías, dade' ni gunii xtidx Dios galoo che räjpnj: “Cua'reni galbitzuu melpla'tga si'cti basoob rexi'n Israel saj bejnnga.

¹⁰ Con meelga guziireni yuj lo bejn ni runchee guejs, sigacni gunibee xtadnu Dios.”

Gusuj Jesús nez loj Pila't

(*Mr. 15:2-5; Lc. 23:3-5; Jn. 18:33-38*)

¹¹ Bidzunñäjreni Jesús loj Pila't ni najc gubernadoor. Dxejc gunabdiidxni, räjpnj lo Jesús:

—¿La luj najc reii xten rexpejn Israel, ä?

Räjpn Jesús lojni:

—Najcni si'cni najlu.

¹² La_lni cabe'c rebixhojz ni rnibee nájza rebeṅgool rexquej Jesús xhetliidi guniidi Jesús.

¹³ Dxejc rájp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

¹⁴ Per xhetliidi diidxdí basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38-19:16)

¹⁵ Neṅ redxe lanij rajpreni costumbr ruslaa Pila't tej bejṅ ni cue rebejṅ loj reni yu' neṅ latzguiib.

¹⁶ Neṅ redxejga guyu' te bejṅ ni sääb xtiidxni ni laa Barrabás.

¹⁷ Cheni tre' guiraareni ro'c, gunabdiidx Pila't lojreni:

—¿Chuni'c rlajztu guslaä, la suslaä Barrabás o Jesús ni laa Crist?

¹⁸ Sa'csi najṅ Pila't rdxe'chlajzreni lo Jesús, ni'c bateedrenini lojni.

¹⁹ La_l ni sobga' Pila't lo yajgxiil cadro rujnni yälguxhtis, baxha_l cháäl_lni diidx lojni, rájpn_i:

—Xhet gundilu dade'ga ni xhet bejndi, sa'csi nuhej nadxuudx gunixcalä xcuentni.

²⁰ Niluxh rebixhojz ni rnibee nájza rebeṅgool baquiilreni rebejṅ te gunabreni laa Barrabás, nájza te guet Jesús.

²¹ Dxejcti gunii gubernadoor stehuält, rájpn_i lojreni:

—¿Chu tej loj guiro'preni rlajztu guslaä?

Dxejc guredxa'reni, rájpn_i:

—¡Barrabás!

22 Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo crujz.

23 Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo crujz!

24 Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni ñaani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuenttitu najcni.

25 Dxejc guiraa rebejnga badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

26 Dxejc basläa Pila't Barrabás, dxejc gunibeeni gudijnreni Jesús dxejc bateednini ladzñaa rebejn te gucuaarenini lo crujz.

27 Dxejc huinä resoldaad xten gubernadoor Jesús lo pretoor, yu' cadre rujnreni yälguxhtis, ro'c batojpreni guiraa resa'reni.

28 Dxejc gulääreni xhajnbi, bashuajcwrenini te lad xniaa.

29 Dxejc bencheereni te coron guejch, basälrenini yejcní, basälreni te yabixijl ñaani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

30 Sas batiobxhejnreni lojni, cua'reni yabixijlga te ni'c batiäjlni yejcní.

31 Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajbni, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn. 19:17-27)

32 Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruzj Jesús.

33 Che bidzujnreni te lajt ni laa Gólgota, nani säloj: dan Calabeer,

34 ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

35 Cheni abacuaareni Jesús lo cruzj, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios.

36 Gurejtireni ro'c, gusloj canäjreni Jesús.

37 Yejc cruzjga bacuaareni te guijt con letrrö. Lo guijtza rcaj xhini'c najc xtoj̄l nani cayejt. Lo guijtza caj: “Dee najc Jesús reīi xten rexpejn̄ Israel.”

38 Näjza tio'p gubaan cuaj lo stio'p cruzj con laani. Tej̄ni cuaj lo te cruzj xladbee Jesús, steeni cuaj xladbäjgwni.

39 Luxh renani sadejd nejzga guniyajreni Jesús, cagusniibreni yejcreni,

40 cayäjpreni lojni:

—̄iJa'ä! Luj ni nutiexhlu guidoo, luxh choñtis dxej niunchesacluni; palga gulii najclu Xi'n Dios, biäj̄t loj cruzjga.

41 Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

42 —Baslaani xhidajl bejn, xhoxh di gacdi guslaani lagajc laani. Palga najcni reii xten rexpejn Israel, sujiajtne lo cruju nanaj te chalilajznu xtiidxni.

43 Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

44 Regubaan ni caj lo recruju sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

45 Dxejcti bicäju guideb guedxliuj läidxej hasta rcachon gudxej.

46 Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

47 Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

48 Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binagra ro' Jesús.

49 Dxejc reni tre' ro'c räjp:

—Basaan; guidon la siäd Elías te guslaanini.

50 Dxejc guredxaduxh Jesús stehuält, baslaatini xpriitni.

51 Lagajc orga biräsya' ladro ni zääb neñ guidoro, gujcnii tio'p la' jiaali hasta lo yuj. Gujc te xuro, sas gusuj bej reguiro.

52 Dxejc gubicaj reguij ni niäuu ro' rebaa, luxh guban sac xhidajl xpejn Dios ni gujt aguc xchej.

⁵³ Dxejcti, che huäjs Jesús lo rebengut, biriireni nen baa, baluilojreni lo xhidajl bejn ni rbäjz guedx Jerusalén.

⁵⁴ Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädnajl Jesús che biriini nez Galilee te bahuiirenini. Cadxelojtisreni guiraa ni cayajc ro'c.

⁵⁶ Tej regunaaga najc Marii Magdalen, steeni najc Marii xnan Jacoob näjza José, steeni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujn te benrajp ni siääd guedx Arimatea; laani José. Näjza dade'ga najc tej reni birinajl Jesús.

⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni.

⁵⁹ Cua'ti José tiejxh Jesús, batejbnini nen te bariadya,

⁶⁰ huitixhnini nen xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini.

⁶¹ Sobga'za Marii Magdalen näjza stee Marii nez loj baa, bahuiireni biga'tzni.

Xhi räjp resoldaad ni cuanäj xpaä Jesús

⁶² Che gudejd dxej xten ni gulec-cheereni lanij, bara yääl bidojp rebixhojz ni rnibee näjza rebejn ni laa refarisee, bidzujnreni loj Pila't,

⁶³ räjpreni lojni:

—Dad, banaj laaznu xhi räjp bejn ni rusgueere. Räjpn: “Che ted choṇ dxej sibansacni loj rebenḡut.”

⁶⁴ Ni'c baxhaḷ chu chacanäj ro' baaga dxejli guisa' choṇ dxej, te di chää rexpejn pacni chaläärenini tiejxhni, dxejc gäbreni loj rebejn: “Agubansacni loj rebenḡut.” Yälrusgueega sajc cuentroru loj ni gujc ganid.

⁶⁵ Räj p Pila't lojreni:

—La'tu rajptu te cuaa soldaad; colchäj, basäutu'tz ro' baaga si'ctis ni sajc guntu.

⁶⁶ Dxejcti sääreni, basäutu'tzreni ro' baaga; con resoldaad bacuaareni te sei lojni te rut falḡdini. Dxejc basa'nreni resoldaad canäj ro'c.

28

Sibansac Jesús loj rebenḡut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn Marii Magdalen näjza stee Mariiga, siädhuiireni lo baa.

² Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga.

³ Rdimbichaduxhni si'c najc che rdinya', luxh xhajn najc nolbäj si'c najc yejg ni riajb.

⁴ Che bahuii resoldaadni, bichebduxhreni, sädiidxreni, gujcreni si'c benḡut.

⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguilḡtu Jesús ni cuaj lo cruzj.

6 Rutini ree sa'csi agubansacni sigajc ni najni. Coltahuii cadro gojtni.

7 Colguxun, colchaye'tz loj rexpejn pacni agubansacni loj rebengut. Luxh naj aguniydni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

8 Dxejcti rusquenduxh regunaaga, biriireni ro' baaga. Cadxejbreni, cabalazduxh zareni sanäreni diidx loj rexpejn pac Jesús.

9 Chela bidxaagreni Jesús lo nejz, räjpni: "Xchan", lojreni. Sas gubigreni loj Jesús, bazuxhijbreni, gudääzreni guenni'ni, gojñrenini.

10 Dxejc räjpni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni loä.

Rediidx ni räjp resoldaad

11 Lałni sää regunaaga, bidzujñ gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga.

12 Dxejc rebixhojz ni rnibee bachagsa'zareni con rebengool te bia'nreni diidx gudeedreni xhi-roob meel lo resoldaad,

13 räjpreni lojreni:

—Scree colye'tz lo rebejñ: "Lał ni nagayesnu, canäjnu ro' baa, biääd rexpejn pac Jesús guläxhiga'tzreni tiejxhni."

14 Palga jiendiajg gubernadoor dee, siohuiinuni te di yu' xhi gunni la'tu.

15 Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijcreni si'c.

*Baxhal Jesús rexpejnpacni**(Mr. 16:14-18; Lc. 24:36-49; Jn. 20:19-23)*

¹⁶ Dxejcti sää retzubiteeb xpejn_npac Jesús lo región Galilee, lo dajn cadro bia'n Jesús diidx guidxaagnireni.

¹⁷ Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni.

¹⁸ Dxejc gubig Jesús lojreni, guninäjnireni, räjpni:
—Arapä guiraa yälrnibee xhaguibaa näjza lo guedxliuj.

¹⁹ Ni'cni, colchäj, guideb guedxliuj colchagajn bejn gac xpeñä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios.

²⁰ Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

5cff1274-8dc3-5398-a94d-f6033bb363c9